

17 5241 .28/399 1


6

1

HARVARD COLLEGE LIBRARY
FROM THE
HARVARD - YENCHING
INSTITUTE

JAN 5 1932

~~CHL 5237.2/399~~



周官大師之職教六詩必以六德爲之本而王制
天子巡狩則命大師陳詩以觀民風故觀於詩而
其人可知也觀於詩不一人人不一家而民風亦
可知也予不敏建節撫吳且一紀休養以無事旣
久而民安樂之則日以多暇乃得振興風雅後先
賞識名人才士於大江南北間凡十五子著於篇
夫人三爲衆至五其三而衆大萃矣雖江左人文
實繁然在吾左轄之內者其亦庶幾無畱良矣乎
昔吳季札觀周樂工歌十五國風本無吳非自孔
子刪之蓋其時僻在荒服風氣未開漢魏以來文



人代興詩乃漸盛至於今而極豈非由
今天子濬哲文明言成雅頌久道化成於上而大
江南北不然從風遂甲天下也與夫上古之九歌
用以勞民勸相而春秋君卿大夫燕饗答貺率歌
詩以交鄰國往往尚禮而息兵如鄭七子及六卿
賦詩見志之類以其有用故貴之也豈若後世月
露風雲爲無益之藻繪也哉今十五子中有連茹
而升巖廊者亦有翹羽於將來者予咸望其載賡
明良矢音卷阿作爲雅歌而追虞周之作者詎不
偉與予嘗舉是集與老友邵子湘氏共精選而存

之得三之一授之梓詩無甲乙以齒次第十五子
者曰王式丹方若曰吳廷楨山掄曰宮鴻曆友鹿
曰徐昂發大臨曰錢名世亮工曰張大受日容曰
楊榆青村曰吳士玉荆山曰顧嗣立俠君曰李必
恒百藥曰蔣廷錫揚孫曰繆沅湘芷曰王圖炳麟
照曰徐永宣學人曰郭元釭于宮但著其地而不
書其爵蓋所期者遠也噫人才之生日盛士本六
德以陳詩於大師者又豈十五子所能限乎行勉
而竣之則吾猶有望康熙癸未且月商丘宋犖序

江左十五子詩選總目

卷一

王式丹

古今體詩一百四十首

卷二

吳廷楨

古今體詩五十三首

卷三

宮鴻曆

古今體詩九十三首

卷四

徐昂發

古今體詩一百一首

卷五

錢名世

古今體詩四十首

卷六

張大受

古今體詩五十九首

卷七

楊 榆

古今體詩六十六首

卷八

吳士玉

古今體詩四十二首

卷九

顧嗣立

古今體詩一百三十一首

卷十

李必恒

古今體詩一百三十二首

卷十一

蔣廷錫

古今體詩八十四首

卷十二

繆沅

古今體詩八十三首

卷十三

王圖炳

古今體詩六十六首

卷十四

徐永宣

古今體詩六十四首

卷十五

郭元鈺

古今體詩六十六首

江左十五子詩選卷一目次

商丘宋 犖牧仲選

毗陵邵長蘅子湘訂
商丘宋 至山言校

王式丹

擬謝康樂遊山

惜春詞五首酬喬楮堂表弟

疑菴目青復明詩以志喜兼道鄙意

次韻答姚曉嵐二首

選一

邨居志感呈喬侍讀表叔五首

選二

高郵道中

秋邨酌客

茆店

疑菴新闢小齋書來索詩二首

選一

是歲十月劉雨峰駕部暨其長公鹿沙先
後初度鹿沙自爲單字韻長歌索和時
劉後齋都諫暨馮文子殷桐高皆有作
來促予詩因疊韻爲贈

讀家霜臯叔墓誌有感卽贈崑繩弟

十六夜劉雨峰駕部招飲次韻

鐵脚道人詩

喬侍讀表叔暨楮堂表弟葬有日矣撫今

追昔泣然有作卽寄無功介夫

呈新城王公

榆耳

蕭尺木凌歊臺圖

夜行

東昌弔鐵尚書

南池

射陽弔臧東郡長歌

白馬湖二首

選一

東軒歌爲韓醉白作

周中行貽秋花一籃並將以詩奉酬一首

雜感詩二十首

選九

與李蒼存話舊

天門引

蛟龍引

霹靂行

日食有雲遮之

暮春雨後宴集再東閣次雨峰韻二首 選一

燕壘謠

曉起乍寒感塔下晚花三首 選二

蓮池菴看菊贈天峰上人四首 選二

蓉江燈夕兀坐僧舍篋中偶攜歐蘇陸范

四君子集其中各有元夕詩閒吟獨酌

漫成一首 睢陽廟二首

大理石屏歌呈甘泉先生

跨虹橋曉望 韜光菴

于忠肅公墓 烟霞洞

次韻弄珠樓二首 選一

瓜步閘口停舟

拯溺圖歌為張令君作

晚過楓香舖 曉渡漢江

江夏城上懷古二首 選一

西爽亭冬杪漫興八首 選四

南中書事 石鐘山

小孤山 采石磯

黃石齋先生楷書孝經西銘一帙張明府

先世珍藏也摹勒上石見貽一編敬書
其後

無功招遊縱櫂園看荷花薄暮泛舟月下

四首

選一

次韻田公湖隄絕句十首

選五

次韻湖堤絕句後十首

選二

題龔敬立意止齋圖

雨後中丞公招同喬無功介夫朱恭亭讌

集因觀名畫卷軸次白田雨夜詩韻

玉帶生歌

題宋山言學詩圖

南唐宮詞十二首 前蜀宮詞十二首

南漢宮詞十二首 後蜀宮詞十二首

題徐昭法先生澗上草堂畫幅兼貽西照

頭陀

雙烈祠

前少司馬繩海張公字卷書後

江左十五子詩選卷一目次

江左十五子詩選卷一

王式丹

方若寶應人著有龍竿集畢蘇集

擬謝康樂遊山

端居感心跡寂寞方至今支離寓遠目牽綴託會
吟暫辭微官縛肆覽名山岑淺茸冒幽石半規冠
高林巫湖遙澹淡斤竹近荒沈天雞南山曙夜猿
石門陰穿雲瞰蒙密攀蘿躄嶇嶽嵐濕空翠影泉
響清琴音巖花裏屐齒天風動衣襟形神倏超越
俛仰猶蕭森靈境成獨往美人勞我心蘊真良有
託緬邈方探尋



惜春詞五首酬喬楮堂表弟

正欲作詩與楮堂十日不見春茫茫長鬢忽持五
絕至開緘四壁風花香
二月東風吹已破嬉春未賦東維詩兩師顛狂不
肯住剛過淡紅香白時
畫川川上春陰寒今朝晴旭開林巒鶯簧燕剪更
不歇蝶粉蜂鬢纔劇乾

主人注易停酒船昨投詩報殘春天酒伴急須招
四五酒錢肯惜捐十千

被花惱徹花不知顛風狼藉餘幾枝欲挂長繩繫

春住催歸一聲春別離

疑菴目青復明詩以志喜兼道鄙意

疑菴所居
名雷雲堂

自號雷
雲子

卓卓雷雲子造物啟清閔虛有玄覽酸醎非俗
嗜凡其目所經意愜好迺摯插架前人編披覽飢
待飼哦詩送日月歲鈔積奇字蘊真逢友生有作
出相示翦燈傾舊醅笑視不逆意書閣對小山松
桂左右侍時攜愛酒伴入林商栽蒔白白兼朱朱
當堦呈媯媚平生集古癖裝潢聚奇秘况有秦漢
物兼之宣成器愛劇十五女几席冷光膩私記寶

小紅雕鐫出程邃韜之古時錦睨之喜不寐客來
沸餅笙兩腋生清吹火候窺蟹眼頭網便可試未
妨動機心坐騁方卦地茶熟碁一終破除閒中事
事各關性情一皆以目治玻璃貯秋水萬類隨所
值如何翳膜生二年爲之崇天旣畱斯人詎令長
瞌睡所以卯金君倏自東海至一朝施金鑲如撤
蒙頭被異哉雙瞳中運此鋒鏃利昔青目之劫今
明天所賜便令諸嗜好一一還清皆譬彼離鄉人
忽焉復其類親黨羣走訊喜躍乃不啻忻忭旣以
深寶嗇良不易戒怒而節勞斯言非無爲光以不

用生如取火於燧用以善藏全涇水乃弗匱請君
試聽之炯炯安其位願言當頌禱長生更久視

次韻答姚曉嵐二首

選一

打頭矮屋只三間簷隙斜明月破環涼吹一簾飄
夜露孤雲兩角墮秋山自能省事驅除病不廢裁
詩句當閒莫怪逢人科跣慣比來禮數已全刪

邨居志感呈喬侍讀表叔五首

選二

一笑年來噩夢空相尋隴上荷鋤翁綠圍四野瀾
漫雨黃覆千塍掩冉風小犢斜陽眠舍北荒雞落
月詔牆東拊膺未是耽高蹈只有爲農術易工

戢影已判百慮刪側身懷古涕潺湲崢嶸牛李玄
黃血跼踖膺滂虎豹關抱壤蝓蛭甘似蜜當門蘭
蕙賤如管請看較雨量晴地不怕風波到此間

高郵道中

艣枝鴉軋破潭烟野店西頭月已懸十里湖堤青
草合露筋祠畔水如天

秋邨酌客

西風捲雨日初斜秋老孤邨感物華
栖畝稻孫能放葉沿籬豆婢不成花
鴈鴻叫野知尋侶豚犢緣堤各識家
且喜新晴農事了共君把盞翫明霞

茆店

又投茆店宿寒氣倍凌兢月墮催村杓
風鳴慘壁燈客囊隨臘盡鄉夢偏年增
夜起何息促惺忪百不勝

疑菴新闢小齋書來索詩二首

選一

岫裏孤雲原不出天邊倦翼未知還
何時白石清泉地著我書籤茗椀間
當砌雨澆花幕歷掠簷風送鳥綿蠻
淮南本是神仙宅飛夢時時到小山

是歲十月劉雨峰駕部暨其長公鹿沙先後
初度鹿沙自爲覃字韻長歌索和時劉後齋

都諫暨馮文子殷桐高皆有作來促予詩因

疊韻為贈

公等勁敵韻疊三而我嘿然中心慙自顧老大髮
種種詎同年少青鬢鬢一舌漫笑張子在七事難
強嵇生堪狂來牛弩揮幾弓酒中鯨吸傾千僖東
城何人最好客路指海岱停羸驂樹霏夜雪正凝
白天開朝霽如拖藍君才有似出林木檟梧梗梓
杉松楠憐予癡客畱王湛愛君名士同劉惔閒齋
烏几塵不浣青氈四角垂璠璣新詩一帙快傾瀉
春空藹藹浮烟嵐豈但會昌窮處士苦吟短什栖

雲菴當年白田恣唱和韻拈覃字相伍參

向有白田唱和集悉

用覃字韻

誰騁偏師破堅陣龍文百斛君能擔京華旅

食亦已久儒冠何日叨朝簪掃門溫卷不得意候

蟲時鳥同詁誦筑聲倚歌闕燕市決背岸幘何耽

耽城南聯句筆齊落

余與雨峰父子有看菊聯句

有如食葉叢春蠶

割截上腴錯珍怪尋常不冝羅餅餽三江五湖大

國楚曹鄴亦復收子男羨君父子詩酒樂虎頭噉

蔗方餘甘一月數逢初度日客中寧謂非美談座

繞梅花浮竹葉盤剝白笋分紅柑但使懵騰共一

醉小山且莫思淮南

讀家霜臯叔墓誌有感卽贈崑繩弟

窆石初封雪窖新墓門應識宋遺民生前淚咽精
魂苦死後書傳舊事真此日長編無定論當年亡
國果何人所南鐵血傳荒井一樹冬青慘不春

叔有

崇禎遺錄足正傳訛其
自序一篇詳載墓誌

十六夜劉雨峰駕部招飲次韻

明燈粲若星圓月當檐大中筵發興新按曲方入
破輪困鯨吸川歛忽餅已臥玉虬促三更揮杯猶
堅坐衫袖滿酒痕顛狂冠幘墮遊人尚轟騰螳陣
門前過里謠及村謳金鼓聲相佐主人亦高歌爾

歌吾能和馱馱困鹽車脫鞵真可賀飛揚跋扈姿

詎爲一官挫

雨峰困于監倉歲杪謝事是夕自歌其詩
二年生跋扈飛揚意銷盡監倉一歲中

鐵脚道人詩

雪沒山尖插雙脚一掬寒香沁齷齪閒披沆瀣誦
南華獨倚烟嵐招白鶴祝融之峰何崔巍盪胸雲
海紅輪開道人一笑凌空去惟有霜風吹老梅

喬侍讀表叔暨楮堂表弟葬有日矣撫今追

昔泣然有作卽寄無功介夫

白日沈西山酸風咽廣陌步出斜街東東有寓公
宅去年一庭花嫣紅間香白今年及花時風景忽

已易翻蓬不繫蒂奔車無停軌變幻如須臾撫今而悲昔誰者悲最深書堂舊賓客

猛虎負嵎怒誰前將其鬚當衢有巨蟒見者蹶而趨丈夫厲風節鴻毛七尺軀對仗屹山岳敵詞闢枝梧至今江淮間謳頌聲載塗福物乃自禍人或嗤狂愚嗟彼蠛與蚋所見徒區區

古者重實學今者崇浮名儒林與文苑乃至分北去聲行鴻濛啟朕兆奇偶苞元精堂堂四聖人寶道日月明後來箋注家軌轍紛縱橫先生衷羣言鑑空衡以平斟酌洛閩理脗合周孔情平生富文藻

本重末則輕微言兼大義詎恨書未成少孫吾何

敢念之涕如綆

繫辭注未竣遺命見委

世人一何愚作偽墮諸苦先生迺大智善為樂之府廣廈所庇覆惠風所溫煦名德彥方尊高義曾連取湯湯東城水畫橈戛柔櫓十畝芙蕖花的爍霞橫浦曉山翠娟娟雜英互媚媿暇卽攜朋好笙歌按一部午橋與輞川疇云今非古皇天斂斯人殄瘁悲吾土鸞翮一以鍛鳴梟叫其伍車子戕遊麟怪風走貔貅

儲得一斛淚迸落為楮堂楮堂今何之絕命詞哀

傷殷勤念故人死生不相忘

絕命三詩
首章見及

去年夏六月

聞訃天一方其父方覲疾其弟親藥湯

侍讀公病疽京
邸介夫侍疾

其兄撫含斂

時無功
家居

飛書報倉皇其母腸斷絕哀哀

慘失明其子纔總角其婦稱嫠孀清詩收殘帙

墨韜寶光精詣觸鬼忌元氣散莽蒼轉眼今年秋

響像空茫茫其葬將有日隨父歸北邙其友滯長

安聞之淚浪浪是父與是子相繼乃溘亡黃塵暗

西城落月思舊鄉欒欒兩棘人與我同摧藏遲歸

闕視窆掬淚書五章

呈新城王公

泰山連梁父堯堯摩青天絕頂見海日俯眎九點
烟天下所宗師濟南王與田山彊敞門庭受經久
駢肩束髮誦漁洋曾未執一鞭初集逮續集端坐
時探研大雅一以邈僞種滋流沿百川各異派清
濁紛鳴濺夫子溯原本疏淪星澗泉滄泓而漭沉
莫窮其際邊古篇聽進退物象供鍤鑄獲領一語
妙便令塵情湔九衢盛車馬蠅螿喧闐闐雲亭清
如水退食手一編涼颺動繁卉幽香展鳴絃蘚徑
屐齒絕積雨縈蝸次堯藩拔俗姿入室良有年猥
以小巫說呈之大匠前慚無水曹句謬荷尚書憐

彦來以豐臺拙詩十
二章呈公猥蒙賞譽

淮南桂華冷葦間自洄旋寂寂長
遭嗤翹望雲中仙驂鸞駕白鳳霞裊飄翩翩粲然
顧我笑濁質思飛翺名豈隨後及分欲依崇宣造
車無岐轍斤削通師傳青原及南嶽宗印一味禪
秋官與農部奉教皆大賢自謂遊其門匪結市道
緣願言窺籬櫺指授披玄詮歲寒有吟侶

彦來有
歲寒吟隅

坐同勉旃

榆耳

新城公坐
中分賦

我聞種白榆歷歷在天上何從摘耳來充盤雜吳
餉夫子琅霄姿沆瀣爲供養駢羅厭羶腥鑫異標

遐尚致此自僻遠枯櫛煙雨釀輪困天花儔翦刻
雲葉樣托根列董苴融液異齏醬蘇頌遺圖經嵇
含闕名狀桑蛾與槐雞品第應多讓芼薑下鹽豉
柔滑一盃漾直教放筯空飢腸太酥盍淮南有祕
術辟穀毋乃誑勿用神仙方且變肉食相嘉筵奉
良會賦物冀高唱

蕭尺木凌歊臺圖

新城公坐
中分賦

高堂素壁雲氣生莽蒼一燈秋山明轟空截業勢
千丈飛流樹頂如聞聲借問此景從何得凌歊臺
畔青崢嶸大江東來抱姑孰天門竦立牛渚橫崇

臺拔地接星絡湘雲巴雪相逢迎寄奴賣屨作天
子目營八極憑江城燕秦電掃自豪喜三千歌舞
隨霓旌至今英雄久灰滅漠然山高而水清鍾山
有客癖撫彷彿坐揮墨潘千升傾不爲永初繪巡幸
臥遊自欲酬生平橋頭策杖者誰子幅巾瀟灑攜
秋英母乃義熙老處士獨依松菊歌閒情謝宅已
荒桓井廢斷碑苔蝕畱空名何當埜立下幽聽慈
姥夜戛琅玕鳴我來讀書三歎息萬年之計徒屏
營涼宵對此且痛飲西風颯颯燈熒熒

夜行

天邊缺月上微明客子孤舟方夜行十里五里見
村落三更四更聞鼓聲雞鳴犬吠破殘夢霜氣星
光浮太清多少閉門人睡熟路旁應笑太勞生

東昌弔鐵尚書

尚書烈烈舊專城戰苦惟憑兩日爭靖難只應同
老鼻成功豈不似陽明誓心埤上高皇字飲恨門
邊鐵板聲厲鬼定從榆木去至今箕尾認精英

南池

大河帆艦酒樓邊重訪南池意惘然呼起謫僊偕
杜叟飄殘白露憶青氈枯荷欹澗無秋水老樹遮

牆有暮烟任令不來許簿去斷碑零落舊詩篇

射陽弔臧東郡長歌

驅車射水陽陵阜互亘峙歎息矚故墟邈哉漢烈士東郡太守標英風卓犖冠絕淮海中拄頤自仗三尺水摩抄顧盼惟張公漢室崩淪千里草建義同心奮天討高壇迸血糾羣侯后土皇天泣酸棗躊躇雁行事已虛北走幽燕通誓書關河阻絕失故主邂逅何來袁本初四州專窟自狡兔勤王大義空歛歔阿瞞憑陵咽吭扼南望雍丘困偏側一請再請恨未伸鼠子敢爾義所斥孤城環甲鋒鏑

裏上報天子次知己冀州作賊急合圍血戰城頭落日紫援絕糧空鼓無聲三軍飲泣爲君死帳前瞋髮挫姦威殉難捐生笑談耳其時郡丞正氣俱一日同歸義不孤却憐孔璋好才調聊城射矢徒區區由來丈夫重奇節披瀝心肝勒冰鐵夕陽荒隴畱遺蹤浩氣穹蒼耿英烈纏霜老木一千年夜悲風嘯寒月

白馬湖二首 選一

襟帶成天險渾淪慮殫河波濤通汴泗風雨挾蛟鼉水落津涯出天清烟靄多安瀾猶在眼疏鑿近

如何

東軒歌為韓醉白作

去歲別君燕市雨今歲訪君蕪城秋不到東軒逾
四載相逢一笑成淹留寒暄甫畢問近狀重君意
氣高雲浮君才何帝較十倍平生惆悵經百憂憶
昔呱呱纔墮地江關流血腥邗溝黑雲如盤覆
井儒冠節烈崇山丘幕府獻策事已去空傳聿牘
摹鍾繇史公殉城韓公繼雙騎箕尾晶芒收孤兒
離母吮母乳天昏鬼哭宵啾啾咄哉辛家一老婦
厥功直與程嬰侔殪屍夾臥蹠萬騎神之所護非

人謀即今磊砢天下士乃從患難延冶裘

醉白尊人
殉難及辛

嫗全孤事
並詳家傳

隻身營家自挺特噓音牖戶工綢繆手展

父書淚千斛聲華迭過騰齊州古來才大難為用
雲飛蛙黽潛螭蚪鳶肩火色有際會如君豈合終
此不讀君家乘吟君句萬古欲共江河流霜天蕭
撼共俛仰茫茫四顧風颼颼故鄉田廬莽水國思
隣三徑偕羊求過旬且辦撥歸櫂白鷗浩蕩烟波
愁

周中行貽秋花一籃並將以詩奉酬一首

憂端如蠶衣糾紆不可理開門視高天秋色忽如

此周子有清癖生事萬花底一畦手栽蒔布置各
有以拭葉搜蜘蛛墜根剔蟲牙愛劇於好女婀娜
嬌未已惜哉風雨狂拉雜摧披靡苦遭茅屋破瓦
礫所橫被一時人與花掩泣泣相視風濤汨郡邑
餘虐乃及爾捲茅且勿歎芳菲悵已矣入秋幸久
晴披尋滌泥滓繞砌細扶持柯條弱相倚天意憐
餘生殘莖出新蕊譬如兵凶後瘡痍乃復起亦如
我久病漸瘳稍色喜我方晝掩關虛過九秋裏登
然來長鬢手擎紅間紫花花何勞榮葉葉亦鮮美
既采秋一叢兼致詩一紙捧詩嗅秋香胸臆豁蒙

否急招周子至對花傾綠螳此皆摧折餘復得敷
華蘄自非培護力曷由甦既死榮悴會有時人生
念終始有酒復有花聊共為歡耳

雜感詩二十首

選九

捲波淮堰浩無邊釜底孤城一綫懸瀕死子遺依
野岸幾時墟落起炊烟沈艾未偃龍鼉穴敝祕方
支雪霰天傳語流移休遠去 皇恩畱命待桑田

吾鄉屢
有賑濟

怪雨盲風去鷁迷高原水出與簷齊

余於七月廿四日舟
過邵伯值大風雨是

日水長
八尺

淮黃一夜沈江北歌吹三秋咽竹西奏入

殿廷勞噢咻憂分司牧竚雲霓青州富弼今非遠
側耳飢烏徧野嗥

高和遺篇歸去來可能懷抱向人開此生自託鏡
爲命不好無勞鳩作媒蘆葉漫逢秋後雁蟲窠幾
聽雪中雷蒼茫不下王章淚莫傍牛衣更論才
跋馬當年向帝都鞭絲禿盡自胡盧功名剛道磨
菱刺世態真成剝粟稔萬里鳧鷗波浩蕩一宵蝴
蝶夢虛無朝來敝篋繙書卷惆悵東村放牧圖
夢到風烟覺後疑十年磨劍竟何爲生能富貴亦
偶爾時有英雄良可知長揖誰當推健者低眉爭

冑事織兒酒酣雙耳猶應熱吹徹西風一領絲
貢媚有靈羣幻怪稱尊無佛亦荒唐豬婆狎浪迎
螺女木老投巖拜竹王水上冰將融煖律形邊影
易墮斜陽謀身自合求長策掠眼菁華爲底忙
閭闔何從問碧翁九衢風雪正迷濛彈箏擘脯客
懷刺躍鳳翔蛟文送窮那得是中真有鬼却教怪
事枉書空從今只學希夷睡一幅團蒲訪華嵩
塵埃蹤跡逐秋蓬香炷燈光此夕中對客敢論牀
上下移家只在灤西東雲邊容與初斜月霜後調
刁乍朔風歸去柴門掃花徑滿邨黃葉暮烟籠

三十年惟成噩夢五千卷不塞飢腸誰能堪此情
難免焉用文之隱亦將盜裏斗儲分鶴柵屋邊寒
潦上魚梁幽偏最喜無人識獨倚枯藤看夕陽

與李蒼存話舊

打槳渡湖去去去都梁山山上何所有白雲擁華
鬢山下何所有清淮流潺湲我有素心人結宇居
其間昔者遊京洛跋馬同追扳相逢大道揖荆高
闕市闌造物忌才名一第為君慳穎末雖少見睥
睨凌九關天池戛扶搖倦翼暫一還故園松謾謾
小徑花斑斑重繙讀過書蕪穢隨手刪春寒二月

半我來自涇灣東陽萬頃雪乘興忘路艱入門笑
相眎喜君猶昔顏秋風遡往事袞袞又一班君才
必有遇我老成堅頑且當入座把君酒燭花一顆
開紅殷高林晚晴鵲新喜缺月西墮弓初彎披篋
讀君出都句快若以指循珮環詩能窮人窮益工
乃知此語非欺謾屋角參旗過夜半荒雞情話猶
能攀天涯依舊南州客髯濤一榻聊耽閒

下榻處顏
曰髯濤書

屋

天門引

紫烟浮浮風舉舉九關峨峨何處所直須白日生

羽翰欲換凡骨無金丹昨宵有夢到瑤京遊仙不見董雙成白玉樓依金闕峙那復作歌人姓李飛神馭氣到蓬萊海水崩騰海日開千尋鐵網沈波底七尺珊瑚撈不起鑿玉槃中凝冷光鮫人珠淚傾浪浪雲裾霞帔儼成行望斷天門空綠章淮南鴻寶憑浪語大山小山誰道許不隨雞犬尋仙侶錯教人認拖腸鼠

蛟龍引

萬丈蜿蜒翔赤霧轟雷夾入星辰路倏忽變化雲濤空不在池中在匣中匣中夜半作鳴吼血腥鬼

語風颯颯三尺寒光匹練飛寶璣不握庸夫手何物細瑣乘昏蒙赤狐黑烏紛吐吐樹底才逢塞鼻雌路旁旋見叩頭猊十年磨厲必有爲此輩何足汗青鋒

霹靂行

黑雲壓城電光焱砰磕頽牆飛霹靂城東一間破茅屋一聲震罷一家哭借問哭者是何家賣魚船插魚標斜行人見之嗟不已尋常販傭忽遭此蛇虎噬人竟何底天怒徒令殺螻螳

日食有雲遮之

月食詩傳玉川子奮然欲以碁磔死今之食日復
何物陰魄橫截陽烏趾漫天忽作潑墨雲安知九
分與十分公府救日不見日縱金伐鼓空紛紛古
來煬竈在左右蒙蔽不甯露脚手機械翕張蝨腹
心外施扁鑰箝萬口太陽逢妖變不測觀者隔雲
如無有雲本山川氣所出敢爲妖黨結霧凜安得
一劍抉萬重便驅黑靑墮地走天光澄澄日晶晶
迅掃何啻操大帚可憐玉川蟣蝨臣側身仰望徒
斤斤手無利器獨危坐明日平章將表賀

暮春雨後宴集再東閣次雨峰韻二首 選一

踏閣穿林細霧沾霏微几席敞虛檐桃花開後鰕
魚美春水生時茭笋甜未怕酒痕傾白袷還思波
影盪青簾十年醉醒東臯路更唱江南昔昔鹽

燕壘謠

前溪啄晴沙晴沙裏落花別院掠微風微風接飛
蟲呢喃只傍觚稜東側翅珠簾第幾重襪襪野鳥
湖之涘朝鳴暮宿菰蘆裏不須苦羨雕梁壘自引
雙雛拍春水

曉起乍寒感堦下晚花三首 選二

曉枕忽若冰褰幃膚生粟榻子紙新糊澹白冷朝

旭小砌一叢花朔風恣撼觸天心雖肅殺萬物有
結束當其天韶時紛紅與駭綠纖鉅各成就於此
得止足人生嗟幾何草草靡定局未華安得實春
秋漫相續徒有千尺柯霜封而雪沃
觀化苦不常乘時苦不早菁華本易竭功成退自
好不見枝頭實反璞以爲寶可憐殿秋花英英媚
晴昊蒂萼纔展舒風霜旋潦倒百年念生平緬邈
托懷抱未得早芳菲何不終枯槁負哉商山人採
芝以佚老

蓮池菴看菊贈天峰上人四首

選二

入門頓灑然參差見秋花冶黃與嫣紅碎翦十丈
霞惚恍維摩室珠林雨華葩塵埃一以掃羣坐寂
不譁心清繞屋香微風落簷牙
寒露折野草墜葉紛委翳移菊方升堂一一護根
蒂始知萬象外別自得津逮請君定中參妙香入
冥契白日過牕櫺鐘聲到水裔

蓉江燈夕兀坐僧舍篋中偶攜歐蘇陸范四

君子集其中各有元夕詩閒吟獨酌漫成一

首

小院微覺春雨葉匝堦罅罅暮色一逕深梅花數枝

亞歛然耿清光片月虛簷下借問此何時佳節試
燈夜萬方喧一槩江城亦忭多百面疊鼓鳴雙響
洵雷炆天涯有客子掩耳坐僧舍古龕暗琉璃孤
檠對書架我本寂寞人闕闐久所卸頗有不速客
異代才可借歐蘇文場帥范陸吟壇霸各呈燈夕
詩晶芒互凌跨六一與世疎朱幘羞俗駕用歐公元
夕登東樓
詩儋州亦戊寅十年悲代謝用眉山戊寅上
元過儋守詩語破帽髮鬢
鬢山房殊自訝用放翁上元
前一日詩語作劇看兒童鬢絲足悲
吒却笑俳偕篇吳俗漫相詫石湖有正月十四日小集詩又
有上元紀吳下節物俳偕體
所遇感其時一一璣琲瀉參差想神采談笑儼迎

迓何以酬嘉賓大酒呼邨醉蓉江俗有
小大酒尚能具豆菹
亦復縷海蛇舉觴咀妙語安用行脯炙微酣起踏
歌風谷答砢砢雖非和節足庶免聒歔歔坐覺市
喧銷清興自閒暇徒倚夜如何寒蟾過西榭

睢陽廟二首

曾披唐史傳遺烈百戰孤城蹟不磨犄角力堪殲
寇盜殞身功已障山河名先李郭懸青簡血並南
雷染碧莎此日楹前修一拜陣雲邊月想悲歌
繡幔烟沈鐵面寒衝冠餘怒尚桓桓戴天定不偕
阿洛斫地還應滅賀蘭鐵鑄賀蘭進明跪塔下
為觀者捶擊止存半體萬古歲時

尊俎豆九幽靈爽託筵尊卽今燈火傾城市彩繪

旌旗徹夜看

座前燈屏畫睢陽戰事元夕傾城聚觀

大理石屏歌呈甘泉先生

井野雲光一千尺化作點蒼峰頂石宣和搜剔特
好奇十二屏風黛螺碧迷離片片米家山鏤玉紫
花瑩光澤物換星移幾百年天上人間慨遺跡先
生集古當臥遊一幅山青秋水白飄然波面三漁
舟摩摸窪隆細指畫一舟兩頭蹲兩人斜障箬篷
如屋幘一舟漁人立船頭勢疑撒網激湍澹其旁
一舟競欲前身貼水方騰擲輕橈鴉軋似有聲

撇漩跳波來絡繹滿陂漪鬱接浮嵐翠色千層落
山脊異哉眼前得此景俛仰蒼涼閱今昔謝公雅
志耽山水水有澄清山崖峇扁舟偶訪玄真子海
上還逢釣鰲客莫言小物作近玩泱泱烟波生几
席何當咫尺起風雲恐有蛟龍移窟宅

跨虹橋曉望

愛此曉色好披衣登跨虹山嵐與水氣合併一鴻
濛須臾初日上隱映孤山東宿霧漸以斂波縠搖
微風羣峰了可數花林見殘紅西湖多好景喧闐
厭息息及此人跡靜萬象凝冲融手掬一泓水浣

滌塵眼蒙瞪視忽絕叫妙筆營丘翁四面空翠來
獨立圖畫中纔有小舸過猶聞鳳林鐘

韜光菴

叢篁高蔽日曲笕細鳴泉乍可尋幽逕真成到洞
天佛燈明蘚壁僧磬冷炊烟歎息香山去無人愛
種蓮

于忠肅公墓

自撫熱血灑高穹隻手扶天日月中中國安危操
上策外藩影響戮孤忠苔封石馬三春雨烟暝巢
烏萬木風相望鄂王精爽在靄旗蕭颯暮山空

烟霞洞

洞口千官塔刻
南渡諸臣姓名

山烟分翠古苔痕佛手巖前敞洞門細數千官名
姓在當年誰解憶中原

次韻弄珠樓二首

選一

矗雲欄檻憑清湖春風萬籟鳴笙竽山容遙繪螺
子黛海氣欲迸鮫人珠層層高挂塔鈴語幅幅細
翦米顛圖登臨饒有謝公興樓前烟景無時無

瓜步閘口停舟

落日汀洲客棹停閘門喧耳作濤聲淮流陡束臨
江下水勢狂奔與石爭遠岸山昏薄霧合平林月

上晚潮生艱難歷盡乘風去此是天涯第幾程

拯溺圖歌為張令君作

去秋子嬰隄潰令君夜半駕小舟冒雷雨往隄所塞決今春鳩

工堅築合邑感之繪圖作
頌號其隄曰張公隄云

水宿其芒汎于東井嗟我墊溺誰實用拯解一維丑

之秋田宅蛟鼉維隄之下尚有栖禾解二支祁如虎

屏翳乃為翼用潰于子嬰千村以顛覆解三電何煜

煜雷何憑憑野哭何哀丙夜冥冥舴艫何駛我公

宵征解四隄流洶洶公心怦怦秋水濫兮微公孰營

之春水縮兮微公孰成之解五有葦在埽束之烝烝

有土在畚築之登登公力拯茲下民兮厥績用升

解六洄洑其沚蜿蜒其峙來田爾田錯勝以如綺公

惠拯茲下民兮豐年有喜解七

晚過楓香舖

迢遞山程結隊齊初冬朔吹已淒淒寒鴉下攏排

牛背衰草連岡送馬蹄鄂渚直依平野北楚宮遙

在亂峰西行行小住楓香路紅葉飄零白日低

曉渡漢江

霧消纔見日風定恰移舟波影連三楚人烟劃二

州亂山臨岸斷灌木隔江稠回首陽邏堡蒼茫正

拍浮

江夏城上懷古二首 選一

西連荆益湘波遠東下光黃驛路長紫蓋飄殘吳
帝去碧雲飛盡楚宮荒前朝茅社原藩輔近日萑
苻幾戰場只有霜風催木葉山山終古送斜陽

西爽亭冬杪漫興八首 選四 亭在黃州署中城上

觚稜亭子冠山城日日登臨倦眼明天影南垂千
嶂合浪花東捲一江橫留連平楚斜陽在寂歷虛
欄朔吹生怪底白頭搔更短思鄉懷古劇關情義山

詩懷古思鄉共白頭

眇眇愁予望未窮遺蹤指點向寒空月波樓敞傳

宵柝王元之月波樓今為嚴更之地春草亭荒入梵宮韓魏公春草亭在安國寺旁今廢凍

合坡陀橫北郭凋殘楊柳待東風年時是處關心
事只在悽迷杳靄中

赤壁臨江百戰餘憑欄北眺每踟躕三分功業何
生亮兩賦風流舊姓蘇匝野暝烟沈絕嘯漫天衰
草暗長湖英雄不作詞人去叫徹荒城尾畢逋

楚尾吳頭天險長山川亂後只悲涼荒城舊址排
危堞舊城為獻賊劉盡亂後麤加修築今城堞多圯飛礮遺痕洞短牆夏賊破城今署中短垣礮痕猶

在鬼火曾看埋戰骨人烟今喜近春陽蠻天箐嶺

星羅地早晚兵銷日月光時茶陵小警

南中書事

禹甸埴墳殊廣大蠻方節鉞漫紛紜欲披角鯉池
邊草旋攪都鵝洞裏雲孔僅算緡原始旣盧循入
海豈能軍詔書一紙烽烟靜重見侏儻拜 聖君

石鐘山

石鐘山下玲瓏白石鐘山上槎枒碧我來欲叩噌
呌音夜靜惟聞水瀟澹曉烟萬樹鬱蒼蒼踏徧嶽
崎對混茫酈元李渤何須問日夜江流悲未央

小孤山

江心突兀生拳石半染蒼苔半枯白烟中絕壁杳

難梯彷彿人行鳥道窄靈旗颯颯碧雲鋪何處彭
郎待小姑霞裾瓊珮波光冷獨對西風夕照孤

采石磯

墮山層疊青蒼裏山色林光交隱起杉松落日冷
于秋掩映紅牆抱山背騎鯨狂客幾時回故壘銷
沈感霸才東西入郢亡吳地枉是江南庾信哀

黃石齋先生楷書孝經西銘一帙張明府先
世珍藏也摹勒上石見貽一編敬書其後

上聖開羣蒙要道植根柢煌煌十八章神明通孝

悌米稻須鼓鹽

石齋先生題詞

子孫繼祖禰西銘其嫡系天

親見一體世儒驚虛談局鑰曾莫啟負哉黃先生
潛然萬古涕

石齋先生云每念曾子爲之潛然

東林倡微言金鑕刮塵

眯三綱隻手扶正氣徹殿陛灑血舊河山荒江水
瀾瀾忠孝性所生遺編抉冑絜二千六十字箋疏
陋盡洗天心照幽暗墨光出犴狴蒼蒼白雲庫法
書凌蘇米季直與曹娥沂原究其底片葉畱人間
畫省珍縉緹傳家壽堅岷金錯鏤蟲蠹專城廣孝
治胞與民所徯惠貺逾瑤華盥手方作禮熏之以
古香味之如醇醴願言依羹牆常用警寢癡

無功招遊縱擢園看荷花薄暮泛舟月下四

首選一

殘霞散欲無暝色下層巘木末纖月生窅窕溪光
晚城隅更幽絕進艇信舒緩拂林檀欒深踏波蒲
葦短沿洄紅板橋吹花風滿滿菡萏綻復含蕊葉
舒還卷但知香淺深不辨花近遠晦明良有時回
頭重繾綣

次韻田公湖隄絕句十首

選五

湖上風濤無日無大隄東望暮春蕪朝來霧樹濃
於黛飛出一雙青鵝鴟

撇漩聲聲戛艣枝烟橫浦澈雨吹絲米家畫稿無

人見乞

去聲

與江南蹋浪兒

漁舟箇箇水之涯
丫髻女兒擲魚叉
不怕風波相

欺得銀釵笑插蕪菁花

杜詩恰似春風相欺得相字音嘶入聲亦見香山詩中

湖邊遊人歸未歸
湖心散綺夕照微
燕子啄泥草

根立鷓鴣銜魚波上飛

可能歸泛木蘭船
檀栢嬉春已隔年
三月東風吹

不盡淮南芳草徧
芊綿

次韻湖隄絕句後十首

選二

遠樹迷濛水面平
拍隄風緊浪花生
憑君唱徹公

無渡猶有鳴榔夜半行

銖衣雲際傍高樓
望斷春山暮雨愁
可似石城催

艇子只應長短入淮流

用義山語

題龔敬立意止齋圖

披圖一灑然為問
此何處君言茜溪
好家在溪上

住三間浣花宅
兩岸桃源路環籬
幾曲水遮屋百

章樹小閣敞虛清
層巒鬱回互紅垂
略徇幽綠齊

方卦布可以足魚
稻于焉侶鷗鷺添
設正未妨止

此亦吾素

原名意設齋今改為意止

美哉曷不歸毋乃為名誤

雨後中丞公招同喬無功介夫朱恭亭讌集

因觀名畫卷軸次白田雨夜詩韻

雲拂簾旌香浮閣蕉塢秋霖溼枯蕩清悶便似寫
 倪迂心與篆烟無繫著遠簷琴筑不聞聲放翁夜雨詩遠簷點
 滴如琴筑逗漏新晴日光薄從容談讌披清風讀畫却
 許生徒同精能神逸有妙理無上證入禪機鋒刹
 那塵眼豁天外琅霄宮闕僊山崇臥遊何處意恂
 况堦前落日餘半弓

玉帶生歌

文信公舊硯也銘云紫之衣兮綿綿玉之帶兮粼粼凡四十四字公既殉國硯歸謝臯羽元末在楊

鐵崖七客寮中號曰玉帶生門生張憲有詩紀之中丞公親見此硯賞歎弗釋作歌屬和

鐵遂仙人披鶴氅吹落紫雲大於掌十二龍賓迎
 冷光珊瑚裏定冰絲網錫以嘉名位上客肅穆風

標自俛仰老婦行謠伴歲寒異代蕭條寄遐想景
 炎南下海天孤相國歌聲入莽蒼粼粼玉帶鎮相
 隨鬼火鶻花寫哀響燕臺人去釣臺荒猶傍亭隅
 奉歆饗白衣拜起靈禽飛四友重尋倍悽愴謝臯羽有兵後

訪文房四友詩

丹書小篆故依然敦貞靈文走魍魎赤霧濛

濛黑浪翻掣出蛟螭一千丈天生神物竟何歸別
 有蓬臺待幽賞昔時山海歷崎嶇今日襟懷照清
 朗却笑容寮非比倫秋聲一輩同標榜翦得蘭根
 心史香好與石君熟來往宋公最賞鄭所南墨蘭一幅余謂鐵崖客寮中物皆不足與玉帶生

為伍以鄭蘭配之乃宜耳

題宋山言學詩圖

涉彼濰水于濰之尾濰之洋洋濰流孔長解一千仞

之翔小鳳是將苞德惟肖緝曜于文明解二竹風委

委桐露泥泥叶灑掃堦祀授詩于几植之有祗被

以英蕤解三車奔于陸孰規厥輻言操之繩俾循其

墨授之在口指之在手惟耳若聽平惟目若營解四

明明者月厥孕維珠光寫于池璣琲麗都貽我一

掬輝于其匱解五濟濟天府瑋瑰其旅眎茲懿矩澤

于古處丁敦已簠金鏞石鼓以埒彼琮琥解六吳山

齒齒三江瀾瀾戟門之下維桃與李既得我師爰

須我友叶用協于中音南風載起解七

南唐宮詞十二首

鴛鴦寺主惜華年貯得春光錦洞天一簇風香迎

鬢朶麝囊花底四條絃後主自稱鴛鴦寺主 周后所居榜曰 錦洞天 后善歌舞尤工琵琶為鬢朶

妝 麝囊花移自 廬山賜名蓬萊紫

豐才富藝總情瀾夜半歌喉未肯閒演得來遲纔

唱遍君王還有念家山後主稱周后豐才富藝又云情瀾春媚 愛語風香又云曲演來遲 周后製恨

來遲破後主 製念家山破

利撥檀槽夙擅名霓裳餘律譜分明怪他入破驚

風雨法曲當年無此聲後主稱周后利撥迅手 周后有所愛 金屑檀槽琵琶 唐霓裳曲不傳后得

殘譜以琵琶奏之于是舊曲復完後主所謂程度餘律重新雅製也內史徐鉉聞之于國工曹生問曰法曲終則緩此聲乃反急何也曹生曰舊譜實緩宮中有人易之非吉徵也

砥室窮歡徹漏壺鬢雲眼彩未模糊相看不用金

虹錠挂定當中大寶珠鬢雲眼彩後主稱周后語 宋獲後主寵姬夜見燈燭輒閉目云宮中每至夜

懸大寶珠光照一室如日中也

司徒重進小嬌娥褰幔含嗔奈若何樂府已傳金

縷曲卻煩文繡被雙鵝周后小周后皆司徒周宗女 周后寢疾小周后已入宮后偶褰幔見之恚甚

後主將納小周后以鵝代鴈被以文繡使銜書 小周后幼以戚里入宮後主頗與狎昵製樂府有袂襪金縷鞵之句至納后乃成禮而已

翠壁紅羅嵌綠鈿交襟密意酷相憐夜深酒醒羣

花裏猶自香縈把子蓮後主于羣花中作小亭僅容二人以紅羅翠壁玳牙綠鈿備極華飾常與小周

后酣飲其中 把子蓮宮中焚香之器

高映桃鬟髻樣齊攀條歷亂絳雲迷江州去後風

流在曾倩花間駮耳梯後主母弟從謙初封宜春王後改封吉王出鎮江州幼時與諸妃嬪遊宮中後

圃時桃花爛開諸妃欲折而條高小黃門取綵梯未至從謙方乘駿馬擊毬引鞚至樹底折花顧謂諸妃曰吾駮耳梯何如

織裳原自愛嬌饒逗漏紅肌稱極腰近日斬新天

水碧齊收秋露染輕綃周后創為高髻織裳 後主伎妾嘗染碧經夕未收會露下色愈鮮明後主愛

之自是宮中競收露水染碧製衣謂之天水碧遂為宋滅南唐之讖

烟輕雪瑩一踟躕舊譜花牋記得無髻髻夜寒邀

醉舞可憐金屑付流珠後主稱周后烟輕麗服雪瑩修容 嘗于雪夜酣宴后舉杯請後主起舞後主

曰汝能創為新聲則可矣后即命牋綴譜所謂邀醉舞破也后亡後曲譜不傳宮人流珠獨能追憶

職領鍾王禮遇殊曾無竹葉駐宮車朝來何事傳

宣急要侍君王卷帛書保儀黃氏容態冠絕一時最工書札後主購藏鍾王法帖令黃氏掌之二周后

相繼專房燕暱故黃氏雖見賞識終罕幸御後主作大字卷帛書之皆能如意世謂撮襟書

喧春鶯燕繞柔儀秋水凝妝獨立時贏得空廊飛

蛺蝶肯隨雙鬢戀花枝小周后居柔儀殿宮人秋水喜簪異花芳香拂鬢常有蝶繞其上撲之不去

凌波舞罷倩人扶纖小雙纏白玉跌從此人間愛

新月蓮中雲裏向來無宮人官娘纖麗善舞後主作金蓮高六尺飾以寶物纓絡命官娘以帛纏足令人皆效之唐錫詩云蓮中花更好雲裏月常新為官娘作也

纖小屈上作新月狀素襪舞蓮花中回旋有凌波之態由是人皆效之唐錫詩云蓮中花更好雲裏月常新為官娘作也

前蜀宮詞十二首

乾德新裁二百篇峨嵋花樹錦江烟內家誦習皆

宸藻不向中書學又玄前蜀後主改元乾德集豔體詩二百篇名曰烟花集韋莊為前蜀中書令

常取唐人麗句勤成又玄集

山接青城擁翠微兩宮玉輦麗朝暉銖衣侍女分行立惟見雲霞片片飛後主母順聖太后后妹翊聖太妃與後主游青城山侍女皆著雲霞之衣

高鬟坐擁四山圍脂盃香隨鏤管飛貪向金華宮裏宿碧烟紅霧撲人衣太后太妃遊丹景山宿金華宮各題詩碧烟紅霧撲人衣后詩起句也

講筵幢蓋嶺雲涵雲裏題詩翠壁鏡蘭若軍持傳

好句親偕阿姊勒宮銜后與太妃詩成即命勒石太妃詩云內人皆在講筵中又云軍持無水注寒

碧蘭若有花開晚紅

金甲珠冠望若神宮娥細馬動清塵阿誰偏得君

碧蘭若有花開晚紅

金甲珠冠望若神宮娥細馬動清塵阿誰偏得君

王惜同上流星二十輪後主北巡披金甲戴珠冠執弓矢而行望之若灌口祇神製流星輦為二十

輪以牽駿馬

同心鈿合手同攜瓜果筵前霧影迷却下金階望

河鼓丹霞樓畔月平西七夕後主與宮人乞巧于丹霞樓

簇定毬場百步開官家白打鬪身材但看錦障頻

移影早是成都市裏來後主好擊毬引錦步障以翼之漸至街市而不知

大內俄看列肆新風帘搖曳畫欄春青衫妃子都

看嫵不羨齊宮酤酒人大內造市肆令妃嬪著青衫懸帘貿易為樂

狎客陪筵侍女隨宣華春苑和歌時君王新曲篇

篇好更唱韓琮楊柳枝後主與狎客曲宴宣華苑履舄交錯自唱韓琮楊柳枝詞

池亭曲宴擁紅梔頰面花冠醉舞欹獨斂雙蛾看

垂釣石欄斜筆寫新詩紅梔花出青城山特為異種後主移植芳林園後宮戴金蓮花冠夾面連額渥

以丹粉號醉粧宮人李舜絃酷有詞藻獻釣魚不得詩為時傳誦

憶得神仙薄媚情柳眉桃臉足娉婷風塵為底傷

淪落一曲甘州不忍聽後主遊青城山自製甘州曲曰畫羅裙能結束稱腰身柳眉桃臉不勝春薄媚

足精神可惜許淪落在風塵其意本謂神仙在凡塵也國亡後宮伎多淪落民間始驗其識

宮殿千門鎖碧流舞裙歌板月華秋人生有酒真

須醉醉殺嘉王唱未休後主宮詞曰輝輝赤赤浮五雲宣華池上月華新月華如水浸宮殿有酒不醉

真癡人嘗宴近臣于宣華苑命宮人李玉蘭歌此詞作嘉王宗壽酒音節抑揚一座傾倒嘉王懼禍為之盡觴

南漢宮詞十二首

家本咸秦南服開新冠平頂視朝回香飄珠殿宮

臣賀越國夫人綵輦來南漢先主自云家本咸秦恥王蠻土自製平頂冠建玉堂珠殿初稱越

帝聘楚王馬殷女封越國夫人

秀華纔見啟金鋪文德旋看繡棋扶好是寒酸陳

著作一篇詞賦賺珍珠先主聚南海珍寶以飾宮室建秀華諸宮務極瓌麗文德殿成著作郎陳光

又獻賦賜珠數斤

風流天子麗宸居鏤柱焚香罨玉除笑煞喫虛隋

煬帝論車沈水却麤疎先主晚年建南薰殿柱皆鏤空各置爐燃香其中謂左右曰隋煬帝論車燒沈

水却成麤疎爭似我二十四具藏用仙人縱不及堯舜禹湯亦不失作風流天子

詔許長和逆國妃殿前稽顙虎綾衣只將一匹朱

鬃馬博得增城愛主歸逆去聲長和國驃信鄭仁旻遣其弟鄭昭淳致朱鬃白馬以求婚妻以增城

公主昭淳自稱皇親母弟清容布燮賜金錦袍虎綾紋封歸仁慶侯長和即南詔

素馨馥馥媚新粧更簇釵梁末麗香一自外廷嗤

北使撚枝喚作小南強宮女名素馨者喜插白花即名其花曰素馨花南漢中宗時周使至不識末

麗館伴給曰小南強其後降宋諸臣不識牡丹宋人給曰大北勝以報此語

記得先皇並寵時瓊仙真合勝瓊芝後宮莫漫稱

房老大寶元年筦百司中宗以宮人盧瓊仙黃瓊芝為女侍中朝服冠帶決事後主大寶元年委政

于盧瓊仙與宦官龔澄樞交通百司庶政皆所裁決

坐擁霞裾帳幄局閣門中使候娉婷曉妝纔畫青

螺了早戴朝冠出御屏內殿設帳幄陳珍寶女巫樊胡子冠遠遊冠衣紫霞裾坐帳中自稱玉皇下降

宣言禍福國事多叩焉瓊仙及澄樞等皆附之宮中婦人悉具冠帶以決外事

千金繡柱建崇基合殿晶芒銀葉衣一道采恩雲

氣白只疑重見玉虹飛後主習祖父之侈立萬政殿一柱用白金千錠又以銀為殿衣間以雲母先

主時白虹見三清殿因改元白龍

六軍中尉進嬋娟姊妹昭陽恰並肩若更蘇園題

扇子一天濃翠兩神仙內侍李託為甘泉宮使兼六軍觀軍容使行內中尉進二養女長為貴妃次充

美人並擅殊寵 南海有蘇氏園雅稱幽勝漢主攜李蟾妃微行憩酌蕉林中大書蕉葉曰扇子仙 南漢亦有昭陽殿

門鑰樓羅曉院深尋花不惜露沾襟輸贏親與君

王看便促宮廚買宴金後主命宮人鬪花內殿向晨時自啟後苑採摘令宦者置樓羅曆以驗宮人出

入法禁甚嚴號曰花禁負者獻宴金要銀買宴

曾向甘泉作候牕祇應獨夜守明缸羞他光艷波

斯女特被新名大體雙甘泉玩華諸離宮皆置宮人以候曉名曰候牕監 宮婢波斯女黑脂而慧光

艷絕人後主嬖之賜名媚猪又多選少年配以宮婢後主與波斯女循覽為樂號曰大體雙陸

媚川日日剖珠胎論甕封藏不計枚九五龍鞍驚

底物海波五百尺中來置媚川郡于合浦定其課令入海五百尺採珠降宋後尚有美珠四十六甕嘗

以珠結鞍勒為戲龍之狀極其精妙名曰珠龍九五鞍見者駭異

後蜀宮詞十二首

畫屏七十作幃宮帳底仙山蹙淺紅不共瓊華舊

時夢奢雲艷雨錦城中後蜀高祖孟知祥初為太原指揮使晉王克用妻以姪女封瓊華公主 知祥

晚年奢侈寢室設畫屏七十張關百紐而合之號曰幃宮又有皇明帳色淺紅類鮫綃于縐紋中具十洲三島之狀夜則爛如金箔

黃龍白鵲霸王符寶冊宮中拜命俱長憶太原母

子日至今畱得麝香駒

黃龍見健為白鵲集玉局羣臣上符瑞勸進遂即皇帝位于成都追冊瓊華公主

主為皇后冊夫人李氏為貴妃

后與子景久畱太原及歸蜀旋卒卒後知祥始稱帝 后有所愛雌雄二貓一曰御花朵一曰麝香駒

紅藥初殘夏景移凌波旋見舞龍螭殿頭聖母親

頌賜畫鼓聲中飀繡旗

後主宴宣華苑賞牡丹重午日奉太后遊凌波殿觀競渡殿即在宣華苑中

進冊呼名簇珮環十三娘娘壓烟鬟排來位號新

宣勅身是昭儀第一班

廣政六年大選良家女子入宮年自十三以上 後宮位號自昭儀昭容而下

凡十有四

青城花蕊舊題詩環珮魂歸夜月疑證得隔生文

字業重磨螺墨寫宮詞

前蜀小徐妃號花蕊夫人即翊聖太妃嘗遊青城山題詩後被害于秦川驛後

蜀花蕊夫人亦徐姓青城人有宮詞百首

舊榻羅綾已壓塵鏤成鴛錦一梭新香消燭炧深

春夜妒殺芙蓉帳裏人

後主初年節儉寢處惟紫羅帳碧綾帷褥無錦繡諸飾中年稍侈嘗命一梭織

成錦被上鏤二穴名曰鴛衾又以芙蓉花染繒為帳幔名曰芙蓉帳

百寶明燈不夜天露臺烟月舞衣鮮倡家第一纖

腰女破得君王十萬錢

百寶燈見花蕊夫人宮詞 後主觀燈露臺召舞倡李艷娘入宮賜其家錢十

萬

廣政年光錦里春桃符瓊語笑詞臣銅龍曉闢香

烟裏遙見雙行御墨新

每歲除夕學士為詞題桃符廣政十八年後主謂幸寅遜詞不工自操筆署云

新年納餘慶嘉節號長春

浣花花樹徧春妍
花外樓臺咽管絃
昔日神魚今不見
未妨斜日絳朱鞞
後主遊浣花溪是時百姓殷富夾溪皆創亭榭名花異卉馥郁十里都人士女傾城遊玩王廷珪賦詩曰十字水中分島嶼數重花外見樓臺前蜀後主遊浣花溪正午暴風驟起雷電晦冥有白魚躍起變為蛟形騰空而去溺者數千人車駕倉皇還宮

早是春回楊柳邊
雪消萱葉翠娟娟
堦前競捧金花樹
別有梁家獨立仙

臘日內臣各獻羅體圈金花樹梁守珍采萱草縷金其上號曰獨立仙獻之衆

皆以為不及

種得仙葩一簇春
香清紅萼自離塵
生綃團扇黃

笙筆賜與冰肌玉骨人

青城山申天師進紅梔子三粒種之成樹其花六出清香如梅後主最愛之命

繪于團扇黃筓成都人善畫花卉後蜀時官檢校少府賜金紫花蕊夫人寵冠後宮嘗以龍腦末塗白團扇時人效之冰肌玉骨後主美花

蕊夫人之詞

柱國丹青寫御容
金丸斜拓竹枝弓
攜將愛子清

如玉鞞鞋兼看趙侍中

阮知誨成都人工寫真累授檢校尚書兼御史大夫上柱國屢寫後主御容稱

旨世所奉張仙乃後主像也旁為太子元喆武士乃侍中趙廷隱花蕊夫人歸宋後不忘故主嘗懸此像宋太祖見而問之詭言張仙宜子之神遂流傳于世

題徐昭法先生澗上草堂畫幅兼貽西照頭

陀頭陀姓戴名易字南枝寄跡於僧賣字葬昭法先生於珍珠塢著虎丘表忠補一篇載文靖公及澗上遺跡甚悉又有釣臺詩

五百首

鼎湖晝暄龍無所
席藁孤臣淚如雨

席藁文靖公遺言也

香草

菴前魂夜飛
臣報其君子
肖父一樹冬青半欲枯

枝上靈禽自儔伍鐵函荒井抱遺編時有風流照
毫楮倏然落墨倣倪迂寂寂空巖帶平楚當年思
肖畫蘭花只畫根莖不畫土澗上襟情亦似之自
寫草堂心毒苦我今讀畫緬遺風江南鬼哭珍珠
塢埋骨憑將賣字人更與流傳表忠補好把嚴陵
五百篇畱伴此圖共千古

雙烈祠

後漢書臧洪陳容廣陵射陽人射陽吾邑之東邨也祠
建於前代新城王公爲郡司李時曾經修葺歲久圯廢
張明府鳩工重修益擴其址今春
落成同用新城公原韻遂成二章

竿摩債赤運義旗指東京列幕如鴈行用曹公語吁嗟
終寢兵空畱升壇語熱血飛縱橫青部雖樹績雍

丘旋見傾丈夫感知已大義况同盟嬰城偏窮蹙
志不苟媮生一日得死所烈烈偕郡丞姦威望非
冀安能挫堅貞至今誦遺文聲淚一時并隕首踐
昔諾豈曰冒天刑用太白語兩公龍虎步視袁猶鮑鮑
耿耿畱響像衣冠照兩楹夜半鬼神入劍戟恍沸
羹哭秦萬古哀何必論存荆固哉范蔚宗無傷烈
士名

雙騎箕尾去晶芒麗瑤京浩然不磨滅痛憤鳴五
兵當其蒞東郡指撝意氣橫脫令都將相可扶大
厦傾匡復事不就節烈心所盟彼哉倂矩人蜉蝣

祇朝生射水流不息傳此守與丞後賢官吾鄉懷
古欽忠貞葺宇踵前武結念相合并擴茲數弓地
畱爲百世刑堦祀掃瓦礫牆壁驅颺颺杲杲日當
戶謾謾風滿楹盼嚮炳管蕭鬱鬯芬旅羹干城在
名教無俾委榛荆詎但修廢墜庶共不朽名

前少司馬繩海張公字卷書後

明史有傳黃岡
杜濬亦爲作傳

天狗西流地維裂羽書瀝盡孤臣血榆關古戍夜
呼庚攬轡籌邊走宛艱大槍尤來蜂蟻屯延水旌
旗盪巢穴捷奏魚河讒口張灌木莊前掃車轍閒
來翰墨時一親掩卷撫膺中惋結起家赴難少司

徒跋扈將軍方齧舌

見杜
傳

筦樞志已擲頭顱皇路

崩淪驥終蹶烏號弓影去茫茫江介回頭心斷絕
天星亂落廣陵濤箕尾騎歸耿不滅上源奉表彼
何人大纛高牙舊同列神州陸沈責有歸一死不
欠臣職畢我披誌傳緬平生此幅還堪覩遺烈許
身豈有故巢心酒底花間祇幽咽

二句用卷
中詩語

曾從燕

市弔文山惶恐零丁歌未歇冰天自去傍龍髯畱
取墨光吐虹霓夜深展卷一燈青颼颼悲風動濔
泐

江左十五子詩選卷一

江左十五子詩選卷二目次

商丘宋 犖牧仲選

毗陵邵長蘅子湘訂
商丘宋 致穉佳校

吳廷楨

次和劉隨州雜詩八首

幽琴
秦鏡
疲馬
白鷺

晚桃
古劍
舊井
寒缸

閒居雜感用壬申舊韻四首 選二

疊前韻四首 選二

奉酬汪東川先生見贈六首次原韻 選三

金山次韻

焦山次韻

桐樹

次韻龍井二首

選一

登南高峰絕頂下憩龍井晚歸紀游得三

十四韻

登六和塔

江行

觀潮

端午後一日雨中集綠蔭齋用坡公雨中

遊西湖韻

試兒行為天標令子賦

淮陰曉發

天妃牘

蒙陰道中

謁東嶽祠

將之秦中示別家人

函谷關

曉望華嶽

涇原感事

金佛峽

大風

中秋後一日秀野草堂文讌用高青丘翫

月張校理宅韻

和露滑十寒詩

選二

寒煙
寒山

宿遷道中

奉和嶧縣道中

曉行

有感

次韻酬友人見慰之作

海客

冰腐次沈洗馬東田先生韻

次韻酬無已見贈六首

選三

讀青門集奉贈邵文子湘

江左十五子詩選卷二目次

江左十五子詩選卷二

吳廷楨

山掄長洲人
著有南邨詩

次和劉隨州雜詩八首

幽琴

山月照磻戶調琴清夜闌松風一以拂繞指流泉
寒精靈偶出聽窈眇成哀彈中散今已矣賞音良
獨難

晚桃

玄都燕麥秀幽澗桃華然託根偶失所受氣常苦
偏晚實自媚好過時誰為傳無言同息媯榮落楚

王前

秦鏡

拂曙啟鏡臺滿匳貯秋水秦宮卷衣迴照豔空波
裏不辭竟體呈所願同心委流影入君懷光明可
得似

古劍

延津暫淪水豐城曾掘地千年蝕土華繡澀翻成
棄閉匣時一鳴願垂及鋒試無爲貴鉛刀徒詡斷
割利

疲馬

伏櫪候晨鐸低頭向路塵誰憐上坂滑鞭策由他
人以茲豆棧戀因與鹽車親天閑看驟裏飲齧驕
青春

舊井

古井塌秋雨森沈鑑猶徹銅餅失水音隱隱聽未
滅無波夕涵虛不食晨凝潔誰爲垂修綆勿使中
道絕

白鷺

靜愛白鷺姿雪絲颺素頸江田煙草春漠漠飛孤
影狎鷗不亂羣刷羽辭先騁卻下曬魚梁蕭閒得

食頃

寒缸

永夜凝蘭缸虛堂照寂寞霜風乍披帷澹澹孤花
落明膏徒自煎冷燄竟安託牆角行棄置吁嗟舊
恩薄

閒居雜感用壬申舊韻四首

選二

抱甕行吟遯跡初二毛潘岳賦閒居荷衣挂桁羞
時製菰米堆甌詫歲儲溪畔白鷗容我狎堦前紅
樹向人疎物情也自成厓異何似相忘啣沫魚
閱歷崎嶇蜀道難輿臺得路笑衣冠身名至竟同

雞肋口味何曾到馬肝誰遣不平收玉局劇憐無
賴逐金丸隋珠謾抵捨榆雀只博尋常按劍看

疊前韻四首

選二

尊前無復鬪身強風撼牕扉面面涼粘壁凍蝸寒
更縮窺缸黠鼠曉猶忙勞生舊逐春秋社習氣新
除上下牀世事推枰今幾局從渠決賭紫羅囊
雲霄誰念鄭虔貧袞袞相逢揖馬塵卿法自佳寧
用我臣年雖壯不如人爬沙短褐捫饑蟲振觸空
囊飼鬪鶉花底拍浮時獨醉暗香吹酒步檐巡

奉酬汪東川先生見贈六首次原韻

選三

少賤儒冠誤長貧旅缺存艱難逃魏厠寥落立齊
門國士矜殊遇王孫感故恩十年湖海客重把寸
心論

雨雲交態幻翻覆異平時羸呂東西帝融修大小
兒腕蘭裳見佩墓棘斧尋斯物理關欣厭寧嗟賞
識遲

欵乃鳴柔櫓遲回別舊廬魚龍江漲冷鴻鴈渚煙
虛縱飲陳驚坐狂歌楚接輿一春游賞地旅迹混
樵漁

金山次韻

萬頃煙濤一轉蓬振衣絕頂御天風孤根冷浸驪
珠窟危宇幽撐鬼斧工四面遠帆雲漢上六時清
磬海潮中長江浩浩分南北不隔鮫人幻化宮

焦山次韻

芙蓉片片落晴波山脚春帆拂檻過江走白沙銜
日月天開青壁削岷峨雙峰縹緲飛仙掌一鑑空
明古佛螺枕石眠雲堪送老肯因三詔出烟蘿

桐樹

庭中有桐樹柯幹何蕭森心孤易爲感風雨揚哀
音吐華春芳歇結實秋氣深惜不植高岡覆此空

堦陰鳳鳥時不來丹山寄所欽

山中有桐樹託質何嶸嶸良工忽見采披拂辭舊
林匪寄耳目玩中含太古音被以朱絲絃裁爲綠
綺琴一鼓再三歎淵魚聳幽沈既諧丘中賞永謝
爨下尋無爲在金井知希徒苦心

次韻龍井二首

選一

杖策尋幽逕禪扉杳靄間天風千壑暝佛火一龕
閒翹鶴苔堦啄驚猿翠壁攀泠泠上方磬清韻落
塵寰

登南高峰絕頂下憩龍井晚歸紀游得三十

四韻

愛茲山水鄉緬彼登臨趣濟勝非所便探奇亦云
屢丘壑或獻嘲烟霞已成痼嘗聞南峰好一覽衆
山具是時梅雨收初日煙嵐露杖策試招尋解衣
並馳驚雲林翳遙岑苔磴穿古墓巖根潛竇滴松
頂危巢護崖傾怯先登谷轉眩反顧屢憩禪關幽
重尋樵徑誤陽葩紛可摘陰蘚滑難步愁狄倚矜
嶰驚鼯竄深錮躋險脚力煩陟巔心神寤豁達天
四垂欹危塔孤注大江凌噴薄列嶂莽迴互俯觀
培塿趨側聽波濤怒遙遙滄海日鬱鬱扶桑樹神

藥行可采仙山渺何處回頭眺城闕老眼隨雲霧
汀舟片葉浮沙鳥微塵聚迺知造境高彌獲賞心
悟淹留愜前期杳靄傍歸路峰陰亂石蹲峽口叢
篁布前臨就坦夷却立餘恐怖岡形屈曲迴澗道
潺湲渡鴈堂何年開龍井終古靈汲水漱雲華煎
茶啜石乳玲瓏一片雲寺傍有石孤
聳各一片雲髣髴三生遇老
僧豎機鋒下士雜緇素微言邈未酬餘景靄將暮
支筇倦登頓汎棹憑沿沂山田噪晚蛙湖渚拳宿
鷺坎坎城鼓動泠泠寺鐘度暝色何蒼然峰頭缺
月吐

登六和塔

孤塔凌青漢天風面面來江光秋練淨嵐色曉屏
開獨鳥衝煙沒連帆帶日迴雲濤何蕩潏東海隱
蓬萊

江行

向夕乘流發凌風一幅蒲潮頭奔陣馬日腳射檣
烏曲岸依山轉遙村背水孤蒼茫葭茨外何處息
行艫

觀潮

閭闔長風吹海立馮夷怒挾天吳入層層駕浪薄

秋旻涼波如沸魚龍泣海門匹練遙飛來龕山赭
山青崔嵬罔象橫衝兩崖東巨靈直擘中流開劃
然分奔吼餘怒霆擊雷轟碎天鼓日車傾晏羲和
愁疾掩陽烏避吞吐是日陰晦倏忽崩騰萬馬獰鳴夷
蹴踏來窈冥雪山摧翻鰲脊瘦冰柱迸裂蛟涎腥
俄聞春岸喧雲碓旋見跳波散珠佩驚濤蕩潏天
低昂亂石旬旬山破碎潮頭一落百尺強迎潮之
子凌蒼茫千桅乍隱鷗起沒一葉忽浮鳧拍張目
精眩轉毛灑浙我生江鄉懵未識吁嗟向若卹然
驚倒瀉長江盪胸臆水犀強弩千雕翎欲尋斷鏃

揚遺靈釣臺西峙灘漲急海天瀕洞孤煙青

端午後一日雨中集綠蔭齋用坡公雨中遊

西湖韻

長日只如睡昏昏散雨足頽簷壓雲影陰曠翳我
目淋浪決漏天宥默墮幽谷忽聞有嘉招悅耳逾
絲竹衝泥徑就飲蒲尊湛餘綠興酣事詩戰摩壘
偏師逐健筆孤飛騫秋空下霜鵠清唵雜諧謔履
舄坐仍促夜闌雨更稠垂溜琤哀玉池漲官蛙謹
巢欹婦鳩哭松杉風磨颭老榦舞獨速疑有物蜿
蜒升騰階尺木靈潦幾時休漏痕交四屋麥死秧

尚穉民命何當續
停盃心懍慌
滴淚分宵燭
翻成愁霖唱
願備采風錄

試兒行爲天標令子賦

璇源照夜凝冰壺
老蚌就掌生明珠
翠睂玉頰瞳點漆
人間又見徐卿雛
去年湯餅會衆客
鬱蔥佳氣方充閭
走邀温嶠辨英物
耳畔髣髴聞啼呼
今來周晬露頭角
矯矯自與羣兒殊
豪鷹剪劣毛骨異
敢以凡鳥題門樞
雲屏翠幙好遮護
抱持保姆顏敷腴
圖史百物羅左右
滿堂坐展紅氍毹
排牕穴壁競覘轡
親戚笑問兒何須
徑前握管隨手抹

似尋字畫摹之無諸餘
玩好不挂眼
豈羨取印提戈及迺翁
雅素耽詞翰
吮毫舐墨勤
咿唔兒生墮地有同嗜
端能讀父盈車書
草牘方當等曼倩
臨書且爲畱官奴
幾人有兒得寧馨
萬金之產良非誣
我歸責子坐歎息
提孩便已趨殊塗
朋來雖有四男子
森如立竹僵牆隅
嬾惰總不好紙筆
召令吐記常含胡
正應坐我老伏櫪
顧後駒齒皆頑駑
韓子不免簡教示
陶公終是憂賢愚
詩成聊復使之寫
得不媿汗沾肌膚
生兒當如李亞子
爾曹碌碌何爲乎

淮陰曉發

孤棹動霜曉夢回問水程入船殘月冷到枕遠鐘
清古樹翻棲鳥危樓咽曙更王孫何處所寂寞釣
臺傾

天妃牓

斷堰鎖崔嵬奔流下石隈勢吞淮甸盡聲撼海門
開水氣晴吹雨天風夕送雷扣舷驚絕險誰是濟
川才

蒙陰道中

立馬飲春池閑閑獨去遲野蠶登晚箔山茗展新

旗岱色紆秦望城陰臥魯碑憑臨多古意尋路入
荒陂

謁東嶽祠

穆穆神居倚岱峰入門瞻拜肅微躬登封秩比三
公貴望祀恩加五嶽崇古壁旛幢搖海日虛簷檜
柏落天風東華塵夢無時醒乞向蒼靈爲發蒙

將之秦中示別家人

一瞬還鄉夢寰瀛竹葉浮故園翻似客別路更逢
秋櫪馬風霜志邊鴻稻菽謀年年慣行役斟酌省
離憂

函谷關

丸泥塞險峙崇墉表裏河山百二重城晚角聲通
晉塞關寒樹色鎖秦封驚心逋客聽雞度矯首真
人跨犢逢西去嶽蓮迎面起雲開立馬許從容

曉望華嶽

曙爽西來嶽勢尊削成天外射初暎寒松翠滴仙
人掌晴雪光浮玉女盆氣肅金晶橫地軸路尋箭
筈倚雲根懸知絕頂通呼吸直欲排空謁帝閭

涇原感事

六師曾此破黃巾千里沙場不見人草木變衰餘

戰血風雲黯淡落愁燐關中轉餉元通蜀谷口封
丸遂定秦誰道河山能設險公孫躍馬漫逡巡

金佛峽

誰關蠶叢險才堪鳥道通雙崖幽礙日一壑迴含
風石劍森相向丹梯杳若空平生無別淚那免泣
途窮

大風

驚沙亂石塞長川羊角團團遠際天地奮千雷龍
起峽山號萬木虎奔泉車橫愁折奇肱軸帆側看
沈破塚船誰續齊諧應志怪南溟欲問化鵬年

中秋後一日秀野草堂文燕用高青丘翫月

張校理宅韻

織雲四卷天垂藍秋山點點收煙嵐海湧峰頭月
初滿茜裙蠟屐爭來探顧兔浮空霜穎濕素娥倚
樹風鬟鬢千枝燈影亂木杪劍池冷逼星光涵孤
懸佛火耿絕壁生公妙諦誰同參廣場嘈嘈簇絲
管飲伴追逐何饒貪中宵皓魄更端正七寶月戶
工雕嵌清景不入俗子賞奈此衆客空呢喃飛蚊
一晌自云樂誰憐乾死書窠蟬吾徒卻愛文字飲
剝啄徑啟蒼苔龕馳書折簡徧招致處士蹶起離

雲菴會稽羅生菊竹箭豫章輦送森梗楠名流絡
繹互奔會吳船越舫浮江潭冠裳之會僑盼至敦
槃盛事傳東南蘭亭草序擘蠶紙紛綸細字如眠
蠶顧余雖是延州後念欲贈縞私懷慙謬蒙簸揚
及糠粃先驅擁篲心常耽延揖三明偕七穆入座
磊落聆雄談鱸縷礎浮佐紫蟹橙絲盤飮兼黃柑
偃師妙舞古無兩漁陽新摻今纔三梨園小隊合
奏樂吳歛嘽緩宮商含行杯度曲美清夜梁臺鄴
苑紛停驂磁能引鍼珀拾芥無德感召誠何堪舊
聞吳中盛文燕耆宿風槩麤能諳宵令嗣宗歎豎

子當效文舉稱奇男往事津津挂齒頰猶有臭味
回芳甘欲將聲氣化同異玄黃水火須平戡况今
崇雅黜衛鄭文教遠覺東西覃酒闌致語各努力
傾漱六藝期沉酣千秋鴻筆付公等夢中花發行
粃粃

和露滑十寒詩 選二

寒煙

荒原莽無際千里斷煙橫獨鳥出還沒亂峰陰更
晴微烘寒燒色遠映夕陽明幾縷村炊接蒼蒼古
木平

寒山

千峰木葉脫石瘦露幽姿空翠橫眉淺高青擁髻
危煙巒晴色隱雪竇凍痕移日暮聞樵唱霜鏹何
處隨

宿遷道中

客意搖搖逐去旌東風鼓浪晝兼程鼃鼃偃仰孤
帆疾烏鵲翩翩五兩輕豈有神工爭地險分無長
算俟河清盈廷當日紆籌策倚舵中流百感生

奉和嶧縣道中

誰將杯水覆堂坳盡日停舟傍葦茅俗競魚鹽農

事廢岡連鳧繹地形磽碑焚野火無遺燎桐斲枯
枝有墮巢倚棹孤吟添悵望何人鞭馬尾蕭梢

曉行

巾車晨動服驂駢石徑荒涼轍跡稀大麓風高譙
鼓咽長庚星爛戍燈微深林客過鴉翻樹古屋人
眠犬護扉憑軾孤吟欹席帽不知零露潤征衣

有感

當饗優歌歎烏烏一枝棲集苑還枯楚弓亡去誰
懸壁和璞懷歸只向隅飼蠱正愁蠶欲嫁翳媒浪
信雉相呼史遷感憤裁書日貨賂交游仗得無

幽蘭鬱鬱合孤生誰遣當門迓物情石亦能言馮
晉國人曾巧笑惑陽城蛾眉自分逢謠詠馬磨何
辭變姓名顛顛青袍今又誤可憐冠蓋漫縱橫

奕碁世事太悠悠覆罷殘圖玉局收急詔未除逐
客令高貲自署富民侯金鞍照路羞縫掖珠履迎
門笑蒯緱少孺詆媿方朔譎空將詞賦託俳優
疎櫺浙浙透風稜枯寂渾如退院僧布被禁寒三
尺鐵瓦燈照影一枝藤感時我欲吟鴛驥寓物人
誰說鷓鴣轉枕槐根方夢覺不教殘睡更瞢騰

次韻酬友人見慰之作

升沈無復訪君平，千佛經中暫註名。
訟速鼠牙愁對吏，戰酣蝸角望休兵。
滄桑小劫窮塵隔，香火前因噩夢驚。
莫爲湘靈重賦瑟，哀絃繁急幾條更。

海客

海客星槎八月通，三山咫尺隔天風。
靈烏待感頭垂白，神鯉剛騰額點紅。
碾盡勞薪歸爨下，拋殘幻戲出籠中。
聲名合得乘除算，磨蠍從他占一宮。

冰腐次沈洗馬東田先生韻

嗟爾出斗筭，胡然厲顏色。
凝脂瓦釜底，結塊冰山側。
舌存唯善柔，骨媚匪挺特。
中乘朔氣凌，外變剛

稜，削然其忌急。煎煬竈利猛，克膚剝蜂窠。
攢面勢蛛網，織冰炭嬪幻。化桂薑攻陰，賊誰云染指。
宜而使探湯，得此物登鼎俎。我心渺鄉國，懲羹費呵噓。
炙手伺消息，斷斷堅白辯。咄咄風霜力，一笑方齒冷。
推案謝不食。

次韻酬無已見贈六首

選三

薄俗誰同調，窮交似昔時。
銜悲石闕語，貯恨錦囊詩。
歸夢宵燈見，流年曉鏡知。
吾衰君及壯，牢落並如斯。

頻年俱失意，枯菀幾曾殊。
抵擲崑山玉，沈淪赤水

珠署名仍浪士著論擬潛夫應歎亡羊者多岐是
畏途

旅榜乘風便歸攜一束書漂漂隨汎梗寂寂臥荒
廬交已疎公叔文誰薦子虛煩君重拂拭厚意報
何如

讀青門集奉贈邵丈子湘

我讀青門集未識青門翁翁名昔震耳使我三日
聾乃於卷帙內忽覺形神通幽覷韓杜室高躡班
馬蹤詩文開突突萬象何春容清秋幕府靜淥水
依芙蓉綿津提詩律旗鼓中原逢郎君好整暇伺

間偏師攻先生真強對酒槩爭豪雄建安父子間
風骨相磨礱新編名井梧叩角來商風夔州老去
後刊落春華叢往聞陳檢討兩髯嘲詠工不須更
纏帛絕倒陸士龍惜哉陽羨生幻化隨鵝籠楨也
生較晚垂胡亦當胸虎賁貌似耳敢比中郎邕低
頭鑽故紙掇拾唯魚蟲先生謂可教惠問勤郵筒
得非事皮相猥及吳下蒙作詩謝不敏猶以筵撞
鐘何時對尊酒一笑掀髯同

江左十五子詩選卷二

江左十五子詩選卷二
此頁為書中正文，內容極其淡遠，僅見極淡之墨痕，似有文字但不可辨。

江左十五子詩選卷三目次

商丘宋 犖牧仲選

毘陵邵長蘅子湘訂
商丘宋 筠蘭揮校

宮鴻曆

蒙陰道中

玄福宮雙松歌呈李木菴先生

陪木菴先生游西山過八里莊得詩十二

首選二

鎮國寺
臥佛寺

再疊韻答文饒枉和之什

次素菴先生韻再送子千五首 選二

長歌贈姜西溟先生並索其行楷書

萬壽寺大鐘歌

李木菴先生壁上觀李松嵐畫松歌

題李松嵐黃山圖五首 選二

墜馬圖為洪丹霞賦

亥秋八月送素菴先生扈從之作六首 選三

憫雨六首

晴雲書屋名畫六幅各題長句請正素菴

先生

黃子久
倪雲林
王叔明

米元章
吳仲圭畫墨竹
石田畫廬山高

讀東江集中門神詩戲成五首即東東江

夏重諸同志一笑

枯木蘭竹圖 送王文在尹艷都

送顧俠君歸吳門三首 選二

消寒第一集分得煖炕限五言古

少司成寄亭張夫子席上同諸君賦石花

魚分韻得十一隊

涿州謁張桓侯廟

武昌懷古用將至筠先寄遲适遠三子韻
歸自黃州內子以春盤見餉用自興國往

筠韻
黃鶴樓小游仙詩

湧月臺
鍾馗圖

漁父詞
牧牛詞

楚巫詞
彼鴛吟

弦齋望興國諸山

江州大雪寄懷韓慕廬先生

彈琴曲贈謝二安
水車二首 選一

閩中紀事四十韻寄姜西溟楊端木查荆

州聲山巖寶成吳元朗王赤抒宋堅齋

團雲蔚湯西厓史蕉飲汪文升安公

自大冶往金陵舟過池口望九華同馮漢

英作
村店女兒行

新茶行倣樂天
徐侶蒼摹古印譜歌

湖口縣
石鐘山

河堤行上華亭公

商丘公送縣津詩集及近稿數種率成長

句賦謝

玉清仙子者亦號珠湖野士秦郵陳氏女

也精三式之學壬遁兵占尤得樞要便
弓馬習騎射信異人也近居廣陵僧行
西與陳中表余因行公往垂簾問答者
竟日數學該博詞鋒銛利三式疑義莫
不迎刃而解繼又自言得長生之術雅
慕冲舉因索余贈詩得絕句八首
淮浦夏日雜感六首 選三
王幼芬太史使黔回以佛指柑遺德州公
有詩酬謝因步原韻並柬幼芬太史
洪澤湖大風雨歌次德州公原韻

檄四蟲詩

蚊 蛙

鼠 蠹

喻司寇招同諸子寓齋讌集庭前盆竹一
枝輪囷曲盤高不盈尺黃質而碧理因
取廬陵怪竹之意作怪竹行限用工部
入奏行韻 玉帶生歌 有序

庚辰冬日商丘公舟中喜晤山言同學兼

送山言隨中丞公按興邑

步韻商丘公秋日廣陵雜興八首

選四

搖鞭晨出長安門長安城西山螻蛄中途突兀見
琳宇宮門不局殊靜便東西兩松夾馳道相距三
丈高柯聯不同喬梓各俯仰只如兄弟摩雙肩垂
纓偃蓋各有意分形猶得同枝駢秦松漢柏隨代
盡造物奇氣鍾幽燕西松公顛被袞冕東松召虎
揮戈鋌我誇此松不去口膝踦手捫行踳躄學士
顧我忽大笑此但小年非大年昌運宮中松十數
茯苓琥珀如擎拳柯交葉錯破烟霧靈根寂寞穿
重泉天昏日黑雷雨作蛟龍鬪急相糾纏鱗爪脫
落不可辨攫拏但聽聲鏗然或疑泠泠漱清澗而

又似撥篁篴弦客來解帶臥松下風枝亂落如釵
鈿我聞公言長太息世間尤物多天全牛山咫尺
交大國家家薪樵供炊烟此材過大斧斤鈍棄置
轉得人矜憐學士沈唵不我答謂我豎義何拘牽
物爲世用乃足貴一梓堪作榱與椽况此奇植歷
千載根節磊落霜皮堅方今匠石構大厦榦中梁
棟枝櫨枿遲遇要以晚節顯有材何得常迍邅咄
哉此語破蒙錮寧用猶豫咨筵筭聯轡談曩日未
夕前途努力吾勉旃

陪木菴先生遊西山過八里莊得詩十二首

鎮國寺

來踐已公約涼風澹客裾未窮西嶺勝先憩上人
居蠟屐呼銀鹿傳餐趁木魚高僧途徑熟指點入
虛無

臥佛寺

古柏秋陰合羸驂放寺門碧泉通磻戶紅葉失山
村已與塵囂隔安知歲月奔追隨愜幽趣雲路許
扳援

再疊韻答文饒枉和之什

我昨蓬藁看楞嚴六時五起撚枯髯刻身換骨非
所願願放文筆無畱淹入損眠食出漂麥坐乏完
席行無幘稍稍會心入毫髮八牕洞揭玻瓈簾此
意可會不可說拈花索笑巡前簷豁如堂阜脫械
杻快若季布辭髡鉗間用此法到章句四大不著
無膠粘名場蹭蹬不自意十年袒臂期神砭人云
大慚文大好何不糟粕求醉霑倚市幸得人顧盼
刺繡無乃勞春纖閉藏多時驥足蹇賞譽到處鉛
刀銛竭來徒步入京洛龜長策短無恒占舊從帖
括讀公作瀾翻舌本韓蘇兼容臺邸中忽御李襟

期磊砢辭溫謙鏘金戛玉惠佳什塵霧罄掃低雲
奩我詩真不一錢直報以瓊玖盈縹緜今年一冬
無積雪馬耳幸不埋雙尖時劃糞粥淡如水看人
滿口誇吳鹽敢因奔逐怨虎兕大抵飄泊同蓬萊
南山落盡一頃豆恨不早痔鴉紫鎌先生顧我有
同病令我涕泗衣裳沾方今朝廷重才傑慎勿脫
畧甘幽潛要須大叫披闔闔迸作霖雨滋閭閻他
時爲公紀大業筆秃千管乾硯蟾

次素菴先生韻再送子千五首

選二

豐臺花放號將離此別何年是見期落月空梁吾

有夢是君疎雨滴篷時

羸驂裋褐走緇塵話到涼暄懶是真鹽豉尊羹殊
不惡京華何許未歸人

長歌贈姜西溟先生並索其行楷書

唐宋幾人能文章千秋只數韓歐陽眉山掉筆亦
健者要於史事猶蒼黃姜侯老筆精文律刁斗嚴
如程不識尺幌寸管百法生大可屠鯨細穿蝨才
名官職孰爲多園冠句屨追丘軻 天子召來集
賢院勝國史事資編摩集賢學士多如草長鞭短
轡爭馳道莫笑追從牛後行眼底紛紛海鷗鳥得

暇搦管摹鍾王腕力秀勁丰神蒼被穿領皂不自
惜素統夜發星虹光愧我廿年死文字敝帚空筌
不忍棄一讀君文一服膺疑是廬陵落今世蘭亭
欲買囊無錢下筆右手愁拘攣極意撫搨畧不肖
一縱便似隨風兼願君迅掃剡溪紙我懸素壁生
雲烟心摹手追忽自得槌牀大叫呼姜髯

萬壽寺大鐘歌

鐘高三丈餘大稱之表裏鑄全部華嚴經
明成祖時造今廟頗荒圯鐘覆草棘中不

懸久
矣

燕邸老蛟角鬣鬣彎弓仰射天庭欹龍孫瑟縮如
蛇醫忍驅長轂蹂江濬自矜勲伐媿軒羲審音按

律谷后夔惟夔一足走且疲謂帝涼薄神所訾何
用篆刻龍文爲欲紀功德臣請辭帝亦忸怩心不
怡聊探珠藏興淫祠九牧貢金方軌馳鑄鐘直遣
銅山移陽爐陰炭周四圍千鈞萬石勞鉗錘蕤賓
無射輕毫釐鼓橐或有神扶持華嚴象教殊恢奇
三周四會張曼詞表裏刻畫同沙錐蒲牢一吼鯨
魚隨即今蹲覆悲塗泥遙望猶似京與坻箕簏不
設誰懸之噌吰發響知何時噫嘻英主多癩疵昭
氏琴果無成虧金山疑塚猶纍纍

京師有金山大師
塚相傳葬建文處天

壽寂寞陰風吹

成祖以下諸帝
陵俱在天壽山

翁仲仆地石馬嘶誰提

麥飯澆茅茨十龍九乳鑄者誰大鐘常有人摩撓
木菴先生壁上觀李松嵐畫松歌

松嵐畫松誰與匹畢宏以來推勁敵數尺根株一
百盤慣將拗筆摹尤物學士壁間畫五松高枝膠
結如蒼龍蒼龍夜挾雷雨至五松嶽立爭豪雄瘦
蛟蟠紙多稜節虎脊熊腰姿態絕老榦常捎三峽
雲新枝已屈千鈞鍊風條露葉故依然化工入手
天無權水墨經營極意匠晴烟不斷青螭蜷噫嘻
艷藥濃花世所尚吾徒冷落知誰向無用霜皮四
十圍有時白髮三千丈願君寶此後彫心桃李春

風莫惆悵

題李松嵐黃山圖五首

選二

我聞黃山石同岑而離立又聞黃山松佶盤或盈
尺懷此頗有年蠟屐定何日我友百幅畫一一神
理出硯漱春泉聲筆蘸古苔色營丘久不作斯人
固其匹相將果此游願言婚嫁畢

與齒缺其角極貴不神僊何當軒轅帝並鶩能兩
全甲挂涿鹿野樂張洞庭邊神竈煉金液雲函開
玉編烏號下鼎湖憑虛凌紫烟小臣載拜泣呼龍
垂其髯至今古山腳丹砂流紅泉

墜馬圖爲洪丹霞賦

洪生久作諸侯賓千鍾一吸同長鯨長安市上忽
大醉騎得健馬深宵行四蹄迸散眼花大城郭轉
側空中墮一時真作黑甜游十日猶看白晝臥朋
知相勸勿太豪狂藥入口如銛刀卽將金鍊鑄腸
胃日銷月蝕難形逃君不見周宣占夢說芻狗一
則墮車一飲酒又不見夜夢飲酒日哭泣哀痛適
以歡樂得洪生聞言色不怡愛我無乃姑息爲杯
中之物不相負世間何地無嶮巇塞翁得馬子傷
髀羊公不醉亦折臂獨清獨醒彼何人博得離騷

發長喟或更深文坐此馬欲罪驕驪赦杯竿馬不
能言對以意君輩拘墟非達者坐客強半生江滸
不騎匹馬乘樓艣浪檝風檣彼一時也輕軀命同
毛羽人生死所不一名最好車中荷鍤行醉骨如
泥亦有用陶家之側皆佳城語盡呼童沽一石以
酒解醒真善策半酣已得蹒跚行門前弔客爲賀
客

亥秋八月送素菴先生扈從之作六首

選三

七萃輪班大合圍侵陵雪色冷征衣罕車絡繹馱
熊至緹騎參差射虎歸木葉山高人去少松花江

遠雁來稀聖朝侯尉無中外幾處離宮帶翠微
上卿秋獮從和鸞玉帳宵聽畫角寒磴道揚旌龍
馭過軍門疊鼓獵場寬磧沙照水痕全白邊樹愁
霜葉早丹聞到西番猶按甲假君尺組繫樓蘭
牙槃賜與割熊肪珠勒銀鞍照地光箭響黑猿牽
葉避弓開青雁趁人忙屢看鷄塞天邊月又俶龍
堆磧外裝我亦久思投筆去幾時陪獵到長楊

憫雨六首

黑雲墮地妖鷓鳴淫霖十日如盆傾只疑國門兩
龍鬪誰能鍊石補天漏人命微賤真如泥僕夫夜

起崩垣隨望日早出偏遲遲

青苔浣壁畫蛤蚧鯉魚尺半行人途天街已斷車
馬跡禿鶯啼來蹲屋脊貧家瘦兒腹苦飢濕雲壓
甌晨無炊典衣數錢呼餅師

宣武門前三尺浪怒似瞿塘不可上常時輪蹄銜
尾來今愁馬倒車輪摧放水出城如放牯滹沱挾
雨欺三峽屋壞墻頽亂鶯鴨

公卿誰不通五行便恐水旱煩宸心歸來行酒
平津宅籍福衆中先避席沈媽施孺歌壇場結束
但到今夏涼天陰弦緩頻更張

凝陰白日呼鵙鷗杞人真抱無窮憂潰堤決岍一
轉燭何論葦簷與蔀屋更聞江南雨無極魚鱉上
樹船入室雁子鳧雛安得食

孫園一椽地稍峻只愁屋墮不愁浸

時寓孫
公園

一飯五

起坐屢遷中夜沾濕無好眠抱書四望百感集古
今人誰不相及袁安雪臥我雨立

晴雲書屋名畫六幅各題長句請正素菴先

生

黃子久

畫仿
董源

晴雲主人有畫癖一生好畫如好色閔藏靈物不

示人人亦能看不能識大癡畫法宗董源暮年筆
力登師壇此畫流傳到今世欲挫造物歸毫端至
元以來誰伯仲墨光入紙烟嵐重巉岉怒削三神
峰浩蕩全吞九雲夢客中安得十日閒晴雲齋頭
晴閉關臨摹數本忽有得爲君歸寫富春山

米元章

襄陽渡口顛風作海水羣飛入城郭山將雨態換
晴容霧霍烟揮破寥廓襄陽老仙筆似椽淋漓潑
墨神理全落筆有意亦無意紙牕素壁生風漣如
此江山晴亦好卻遇陰蒙變昏曉譬如奇士值事

變始有英聲播四表噫嘻人事乃在物理中顧我
飄蕩如萍蓬風雲可托不可托局束只與常人同

倪雲林

有董思
白題句

青閼閣中塵浣壁雲林宿草深一尺只今翰墨在
人間一紙豈止千金直晴雲齋中洗眼看韻高氣
澹如幽蘭快劍無痕劓絕壁木葉半脫波聲寒華
亭宗伯老好事卷額橫題數行字手追心慕入微
茫謂是荆關落今世雲林蕭散誰與儔兵戈遁跡
歸山丘須知人潔畫亦潔下視濁世同蚍蜉

吳仲圭畫墨竹

寫竹之法通六書俗手易爲筆墨拘何人寫竹有
成竹作家首數橋李吳錢塘潮飛强弩射此畫閱
人如傳舍鬼物護藏得至今三百餘年神整暇我
昔家居綠玉村此君相對碧璘璘朝看暮倚不闕
惜繁陰借與東西鄰只今羸馬風塵地夢中未寄
平安字誰令仲圭爲此圖一憶龍孫一長愧

王叔明

細草氈毯如石髮連山十里苔紋滑凭得吳興黃
鶴翁筆底收來最清越西崦東埭山模糊空林黛
色疑有無雲根忽結數椽屋疑是太古幽人居風

吹香雪青春老雨閣烟扉一時好若向王維認本
師此是輞川真畫稿倪王山水舊齊名干戈滿地
雲林貧蒙也暮年牽黨籍奇技從來不庇身

石田畫廬山高

有石田自題廬
山高古風一首

石田老人筆有神匡廬面目爲寫真犖确高峰駢
駝臥蜿蜒懸瀑蛟龍蹲更叱巨靈運神斧削出坡
陀似懸乳哀猿下飲難攀條寒鳥歸飛愁墮羽萬
古盤渦轉輪轂三疊水簾珠萬斛游人總向畫圖
看依稀認得康王谷何年來游支短筇笋輿芒屨
相過從會當洗耳萬山頂高揖五老看爐峰

讀東江集中門神詩戲成五首卽柬東江夏
重諸同志一笑

描成金紫未爲真也學將軍感故新無策門庭防
暴客有時簪笏比陳人齟齬祭日同中雷關節通
時卽要津陞楯諸郎憐雨立秦優畧似爾長身
骨幹靡靡一委形炎涼瞬息已週星畧憑脂粉裝
睂目遂有輝光照戶庭鳳字題門宜避客羊頭媚
竈可通靈鳴珂舊宅過時到脫落皮毛屋畫局
每到冬殘似賄遷西園列市易夤緣縱思趙勝誰
工繡且買司徒莫靳錢占籍何言門第好爲神終

愧貨刀賢戶樞不朽君母羨纓紱從來比嚇鳶
刺繡俄思倚市闖因依廡下事尤艱中庭引吭形
如鶴直夜慳眠目似鰥蟾鎖乍開人面轉獸環低
撼履聲閒上東門外聽長嘯尚有銅駝蝕蘚斑
鬼瞰神猜事可憂疲兵終日戴兜鍪衰遲忍聽廢
屢曲美好難封戶牖侯陳平封戶牖侯列屋盤餐誰與共倚
門骯髒定何求用蕭望之人間無限炎涼意送故迎新
卒未休

枯木蘭竹圖

雷公追青虵破空若枉矢墮此石罅中尾角半枯

死劫火燒千年倔强具生理而豈不材木偷生待
窳嵒叢蘭亦幽人細篠比君子結交來空谷衆芳
望披靡嘉植雖異抱苑枯自齊軌譬之標季運卷
舒各有以滄海方橫流端居思彼美

送王文在尹鄠都

地絕中原俗自醇平都春望草如茵揚颿初上瞿
塘馬斫鱠先烹丙穴鱗兵甲銷時征戰少雁鴻歸
後版圖新時流入入蜀占籍者以數萬計還朝應上賢良頌宣室無勞
對鬼神

落日春山聞子規排船惟有鶴琴隨江分巴字劉

焉國錦疊蠻箋杜甫詩木佛那堪燒舍利叢神應
怕毀淫祠邑有王方平廟俗云與冥司相通君名舊在靈仙錄且與方
平話見期

送顧俠君歸吳門三首 選二

桃竹三尺弓青莖一囊矢君射南塘鴨我射東臯
雉相望雲水間相見長安市沽酒道心曲托身等
微技明日秋風高聯袂一水止雉翔寥廓中鴨沒
寒潭裏去矣勿復云拂拭衣上滓臨岐有贈言弋
獲古人恥

君手青萍劍我腰白玉斧斧劍固殊用用之同所

取鍛斧爲劍器切玉碎如土冶劍作斧斤自署脩
月戶二物雖同心市兒半聾瞽鄰女解自媒倚門
被繒組薔薇塞東籬桃李荒舊圃利器猶在手藏
以待良賈

消寒第一集分得煖炕限五言古

朔野號天風射我玉肌粟朝出狐謀裘夜臥鷺拳
足脛縮被生稜半牀未嫌促譬以地賂秦尺寸不
可復巧者一何巧置槩定方幅東西依兩垣寬平
半橫屋北戶瑾嚴威南榮就朝旭最宜列高牕取
便寫文牘朝治夕以成稱名混土俗繚之青蘆灰

緣以白文木施簞有餘地兩端置箱篋不因徐孺
懸難容孟叟跼朝客躡履升文茵疊方褥蓐食憐
淮陰長跽笑籍福瓦溝馳炎官花磚隱回祿文明
耀地中象取明夸畫挾續難比溫吹葭未云速壁
燈滴香穗頂棚燥葦束借煖活花卉收烟種萊菔
凍蝎跂欲行寒蠅癡不伏誰嘲竈下養此非厝薪
宿惡臥兒不啼吉夢婦頻卜紙牕捲風簾非烟散
遙矚市聲穿枕來鬧坊賣漿粥爬羅出餘燼透露
發新煇棄灰當塗高秦法不可督福過易生災寵
多乃延辱炙手詎足誇熱中亦宜沃坂或名頭痛

國如號身毒飲冰消煩心喫水豁眇目抽薪冷翠
釜炙涼一反覆我作煖炕詩主文寄忠告

少司成寄亭張夫子席上同諸君賦石花魚
分韻得十一隊

定羌古巖邑渾河喧地肺

魚出保德州

波寒衆鱗滄濤奔

萬渦碎山骨剝蒼蘚險喁各成隊

冬月魚食石蘚而肥故名石花

舊聞

石花魚上方作珍饋排船狎高浪勢如宋鷁退

河

奔迅取之甚難

玉瓶舉網收盈尺若垂臂花瓢注清水醍醐

灌頂背傾瀉不到地堅冰已成塊四照琉璃中紅

腮尚噴沫

魚冬月取以水注之成冰卽以帛裹之

鮮腴入天膳奇零落闌闐

一尾一金直爭買若珠琲吾師上日宴颯颯響驚
瀨朝來食指動下春得異味翠鬣試一割膩理衆
所愛撐腸罄晶盤洗耳聽珠欬撫今念在昔放筯
發長喟前年打鮒魚中使走十輩江魚尾半赤官
長心已痲分頭捉網戶吏牘連月廢吳趨到幽燕
置驛一何駭販夫或偷賣翔價已十倍 天子却
異物煦濡加勞徠比歲桑麻陰不聞夜犬吠綠疇
事耕作黃雲催銍刈時時水廟前漁師來報賽我
本江南人尊鱸雅意在逝將歸去來論頓飽鮭菜
誰與思秋風連車可同載

涿州謁張桓侯廟

泥深路滑客心疲立馬斜陽讀古碑州破猶全天
下士軍行何負帳中兒靈壇松老森高燾古堞霞
明捲大旗主上東征亦蕭索眼穿難得沼吳時
武昌懷古用將至筠先寄遲适遠三子韻

鄂郡英雄之舊里背插千峰面流水我來不見紫
髯翁那復夸張到餘子北望邾城西夏汭

邾城在黃州
陸遜所築

磅礪山川爭臥起千年惟有浪淘沙萬事忽然風
過耳漢江南流到建業自昔金湯稱表裏劉勳敗
衄黃祖破散花洲前一喜

孫策破劉勳屯西塞山卽今道
士洑也又策破黃祖宴軍士沙

仙棗瑤林垂纂纂雲壇碧海起峨峨七十二峰行
遍處漢江今夜月明多

湧月臺

黃鵠磯前一片石湧月荒臺畱墨跡承訛襲繆不
復論想見英雄舊標格漢陵草色千里青銅狄破
碎無完形征西將軍謫如鬼欲鬻走鹿嘗膾腥荆
州俊君自虎視但有豚犬無兒子江東走死大耳
兒肌肉時時消髀裏吳中會獵思高秋檄書草出
頭風瘳顧曲郎君一彈指吳回赫怒焚連舟東風
不借周郎火銅雀春深二喬鎖此是西崑得意詩

忖量老瞞心亦頗君不見冀州兩雛將就烹今年
殺賊正爲儂袁家新婦頭不舉姐已亦賜姬文公

用孔北海語

鍾馗圖

歲晏天陰雲潑墨黑風吹沙起平陸冬青樹底啼
妖鵬信有鬼瞰高明屋箕帚自飛車自覆血碧燐
青髑髏哭殺豬烹雞走廟祝木佛泥神都蓄縮老
馗來自終南麓戟髯張肩手拄腹帶緩靴寬著儒
服豐隆爲車電爲目怒折鬼臂鬻鬼肉一揮何異
空壁逐徐倚長劍手一牘報汝平安錫汝福茶壘

當門聽爆竹不煩香鐙事響卜曈曈朝日行若木
萬里春光變清淑

漁父詞

西塞山高江水長漁人刺船沈大網磯頭白鷺翻
雪飛水底長魚裂波響兩岬漁罾多若織戢戢小
魚逃不得大魚入市三百錢小魚論斤聊取直網
師罾戶俱業魚亦分大小輸魚租水仙祠下賽神
罷呼羣換酒歌嗚嗚夜來打篷一尺雪江港蕭條
菰蔣折酒醒不聞人語聲楚天萬里鳥飛絕

牧牛詞

林豐草肥山複脊牛背臥兒如臥榻三三五五渡
前溪麥短不妨牛踐踏羣兒牧牛上南原山花壓
帽語笑喧探雛纜上籬邊樹吹笛還過花外村去
年雨少收不足八口一家全恃粥阿翁輸租莫賣
牛轉眼明春生小犢長安馬上多公卿白髮仍愁
世網嬰如雲車騎那長在安穩何如牛背行

楚巫詞

紙錢挂樹酒盈竿旋風陰森神下馬一村父老趨
如狂鬼燐神燈照平野楚巫跳踉舞且歌楚媪擊
鼓兒鳴鑼脯脩鱸薨自狼籍烏鴉銜得升高柯楚

俗從來畏淫鬼綵繒神衣盡紈綺一朝堂宇野火
焚四壁猶存庭樹死香案周遭長榛棘盃玳筵算
一時失天陰日暮雨淋頭偶人猶作猙獰色

彼鴛吟

輪困庭樹十圍大蠹之只用一寸蟲此蟲食心不
食葉枝榦雖好心已空支撐或更賴木石顛仆未
免愁北風何來彼鴛鳥鎮日相擊攻雌雄上下作
禹步鉤鉅有術來發蒙長吻利爪似錐鑿卻令病
槩回春叢紅襠綠翅捷緣木臥聽神鼓敲丁東噫
嘻蒼鷹肉重飛不起人間狐兔蹲蒿蓬搜索羣蠹

縱勞苦尺寸自効非全功

弦齋望興國諸山

青山列南榮嫵媚似西子若無大圓鏡雲鬟不可
理快哉金湖流江濤此輪委每於春夏間一碧四
十里白雲冒山顛清流漱山趾有時風雨來變滅
隨寸晷我來坐高樾風定波不起良辰一凭檻長
日一隱几蕭散無俗慮嗒然忘愠喜何當汎洞庭
芥胸見鵬徙作賦弔古人氣摩屈宋壘

江州大雪寄懷韓慕廬先生

盡本韻

潯陽仲冬客舟過風捲雪花席片大清冷不敢開

蓬牕布被蒙頭著船臥黃頭踏市買烏薪藁束筠
籠冰雪浣煎茶不成且煎炭綠烟滿船起危坐須
臆臆飛繁星猝欲遮防更無奈過時吟膝高並
肩始聽銅餅蚯蚓和茗椀爐香何所營聊用清詩
洗寒餓鹽絮吟成不直錢畧似南冠歌楚些卻憶
前年京洛游副相府中忝賓佐荷公忘年亦忘分
赤幟招邀刷塵堞永光寺西南市頭霰雪封髭泥
沒踝我亦素解濁醪理百呼一不辭勞瘁有時漉
巾盡一石有時坼幘喧四座爐頭曉日扶桑烘缸
面青篔竹葉拖白雪當筵不敢豪朱顏得酒春先

播風情跌宕氣如雲縱有寒威先禁呵僕來廡下
沾殘膏馬放棧前飽新莖歸鞭不怕催更籌醉眼
只愁逢夜邏比時滕六故依然逡巡不向尊邊墮
我公文筆今昌黎萬象直欲毫端挫爬羅剔抉啓
來哲八代同時振衰悞殘賸一任學子乞襟度從
今朝野譟不因冲謙遠聲譽便恐高名塞天破鯁
生此腹何所有敢以頑礪求劇磋立雪縱愧游楊
徒側席頻承珠玉唾自知才命俱人後廿載名場
遭跌蹉飯顆吟成不自聊長門賦就凭誰貨青衫
席帽出都門掉頭三年悲轆軻柳車送窮本非策

閩越荆吳一旋磨豚犬冲穉宰下邑基薄墉高愁
負荷縱有微祿供酒資未抵薄田收秫稔倦鳥無
因息羽翎疲驢豈得辭鞍馱怱怱復作榕城游藥
亂花飛沒坎珂今日琵琶江上舟坳堂一芥愁掀
簸荒村寂寞無酒鑪敗簾哆張理詩課迴望金臺
紫翠間懷人感事真無那賣文餬口東南州零落
酒人還幾箇別來江闊鯉魚沈世路艱難非懶惰
明年又擬踏槐花樂事歡場猶可作待公澣沐得
餘閒醉白堂中一相賀

彈琴曲贈謝二安

魚在淵鶴在天空桑六尺張吳絃琴聲希琴韻古
促軫調絲鳳凰語宮商一一臣與君牛鳴甕盎羊
離羣九疑塚荒二妃老水邊有客彈南薰勸君且
賞無絃趣鍾期那有黃金鑄我亦齊門抱瑟來不
堪短褐隨飛埃君不見二十年來一翻水雲門歇
絕新聲起繁哀滿地奏伊涼箏笛琵琶聒人耳

水車二首

選一

阿香推車轉山麓馮夸春雲響空谷蛻骨瘦蛟盤
古槎翻尾鷓鷯整復斜咿咿啞啞終日鳴不聞人
語聞水聲造物自忙人自逸似役鬼伯驅神兵水

車水車爾何利勺水寸波俱有稅君不見權關直
到閩海頭那得不算車與舟

閩中紀事四十韻寄姜西溟楊端木查荊州
聲山巖寶成吳元朗王赤抒宋堅齋團雲蔚
湯西厓史蕉飲汪文升安公

百越雄南服三山近海陞不知天隔閩坐覺地支

離石氣千林黝波聲萬馬嘶迢遙過嶺日仙霞嶺閩之北門杉關閩

之西黯淡下灘時北自浙入閩西自豫章入閩灘石險惡各以百數而黯淡灘特著名蠻俗聊供

笑方言可拾遺地曾無朔雪人不解流澌草木誰
編譜禽蟲任缺疑聊因耳目暇一廣見聞資艷目

惟園果垂涎首荔枝麝臍香易落荔實時遇麝則落石背溺

先菱荔樹生蟲如荔枝核一生十二粒遇閩又多一粒各石背荔香時即溺溺而全枝脫蒂矣絳實盈筐瀉晶

丸帶葉垂水晶丸荔之美種還愁稊孕早或售互人欺荔園受賈人直

謂之稊荔有稊花稊青稊孕之別大抵以稊之遲早分價之高下稊時倩鄉老估直名曰互人樹主稊主爭賂之亦可封泥

活無勞置驛馳荔枝小幹泥封一二年生根花時截取郵致京師結實無異緗枝防護密

夜燕所過則荔子一空害又甚於石背故防之甚勤苦龍眼唱歌遲倩人採龍眼恐其恣啖故采者相約歌勿輟謂之唱龍眼

佛手寧非柿會城外齊坑道者巖有柿一枝結實如佛指柑長六七寸皮穰色味皆柿也鰕頭儼似

螭漳州龍鰕儼然龍頭也大可三四觔味美如蟹螯品茶知太姥太姥峰茶品極貴咋舌羨

西施西施舌會城亦不常有柱剖江珧美春隨海扇移海中甲物於春三月出名海扇

珠蚶佐羹臠小蛤名石蛙長菱蕤一名龜脚春而發花蠢動憐沙嘜

無首無目僅能蠢動觸之則縮小徐復臃腫味極美四明亦有之閩人呼為土笋 蹒跚笑海螵 海中大龜 飛

翔龍蝨出 八月十三至十五海濱龍蝨飛集取之餘月絕無 束縛虎蟬 蟹之大者名虎蟬

鱉醬空盈甕 土人重之味極不堪 蘭湯亦滿匙 閩人以珍珠蘭點茶不聞有毒人之說 颶母踏波

珠娘擔石過 閩中呼婦人為珠娘言其貴重也然地狹民貧凡負薪駕舟皆役婦人為之

嬉象譯唐朝壤 日本人呼中國人為唐人 錢刀宋代貨 延建以上多用宋錢 雕鐫

疑鬼物刻畫見鬚眉 雕漆器及自鳴鐘皆有專家絕技如鬼工然 秣厲千章樹

有高二三丈者花亦絕不同 猗蘭九畹姿龍頭藝燈火 龍鰕空其中作燈觀者特駭目 魚

魷絡藤絲 魚魷蘭吳越亦間有之莖白葉劍立者是也魚魷嬌則莖細如藤絲力不勝花開時橫陳密葉中 蜃戶

汨波出礮田帶火治 閩地多山山麓盡治為田曰礮田 搏沙珠傘孕 汀西

丘坑口撥土一寸許有珠大如粟光稍晦相傳汪革據歛巡行至此有珠傘風掣落至今生珠 告廟土牛為 取土於閩忠懿

王之廟牛始可成 魚訝連山大鰭堪一木支 魚骨可作樓觀 竹森如擲

火 曩見畫家寫竹用硃不意延建間實有之 榕蔭似披帷俗習干戈便 兵後尚武家藏甲者

頗多人亦趨捷取一夫之敵 人操硯席隨 人又以文事相尚至於臧獲賤隸多能文者 蛭苗代錢

鑄 壅水為田種蛭其中苗初出蠢蠢如蛭子 螺甲透襪襪 螺甲作香即古之甲煎香 卷舌侏離語

文身漫浪兒 閩俗多雕青者 稗官畱小說淫鬼踞高祠 所祀鬼神都不

可解最可怪者洛陽橋祀夏得海會城祀齊天大聖 述異資談數催詩倩酒卮荒唐

來絕域懷抱向京師鐘鼎諸公業山林我輩期雖

憐趨舍異未覺性情岐大海難蠡測奇聞只管窺

采風誰氏職聊用播聲詩

自大冶往金陵舟過池口望九華同馮漢英

作

人誇游山好游山祇一餉後山甫登涉前山已遺
忘縱令腰膂健蠟屐費幾緡藉曰住山佳住山似
屏障圖畫久相狎寂寞神已喪生平喜看山眼明
心曠放看山肩短輿不如乘白舫舟行山側飛舟
住山正向我從磁湖來輕舟狎波浪初裝宿湓浦
匡廬固無恙今晨池口泊九華爭獻狀朝日生紫
烟夕靄羅翠嶂雲端九仙人如坐几案上小峰插
釵鈿高岫排隊仗尖稜隱復見陂陀抑逾亢琉璃
一泓水澡洗出盆盎盡日相周旋一一窮變相贈

君看山詩不游寧缺望

村店女兒行

村店女兒年十六黑鴉羣中一白鵠野花隨時插
半鬢葛袖苧裙新結束倚門望見官人至轉過牆
頭不迴避官下肩輿入草廬問有午飯餉客無荅
言阿耶往輸賦漉米旋炊誤行路壺中有茶吃茶
去

新茶行做樂天

六安山中種茶客來宿平塘主人宅我亦肩輿憩
此間土牀相近蓬牕隔客子誦誦語僕夫今年寒

土春不蘇六安山中雪一尺黃金如土茶如珠進
茶例限四月一三月寒猶刺人骨旗槍未向雪中
生檄符已自州城出何處南枝長粟芽持金轉買
向鄰家往年一樹一金直今年三倍輸官茶儂家
有茶十六樹里正來科種茶戶慳囊滿撲三百文
沽酒殺雞寬旦暮明朝賣女與商人七尺銀鐺始
脫身官火乾焙局秤大折耗錢增二十緡幕司齎
送到銀臺蠟裹筠籠當面開通進堂官凡幾輩樣
茶一一封呈來可憐進茶未十日春雷一聲萌葉
茁換鹽換米不直錢只今販向全椒驛我聞此語

重悽然靈旂如今合棄捐但知捫乳和酥煮誰解
分泉沃雪煎中朝又說武夸好陽羨棋盤賤如草
頭網入庫飽蟬蟲枉用僉名書進表

徐侶蒼摹古印譜歌

古時作書無墨楮以刀代筆殊覩縷標枝結繩非
所安要以文明振聳瞽庖羲龜龍象旣陳頡皇魚
鳥篆可數蚪章初傳宣聖經穗文亦辨神農譜周
官六書保氏職太史變文今共覩上蔡丞相作小
篆千禩師承如物祖秦火以來文字阨往往帝魯
呼魚虎嶧山高碑歷劫盡之杲舊搨六丁取銷鑠

不存三命鼎破碎誰收五熟釜荆山玉璽走沙漠
成臯印文埋厚土後來祭酒工說文陽冰披搜非
小補不虞鉉錯兄弟間祛妄書成譏莽鹵徐楚金著祛
妄正李陽冰
之誤今人縱復有微尙但可百千存十五齊昌徐髯
癖書畫酒闌逸興軒着宇華門蓬戶一何有惟有
湯槃與周鼓撫榻登封詛楚文跨斯拉籀追皇古
餘事刻成一方石三寸精鋼巨靈斧格澤聲同錐
劃沙滴瀝形如屋漏雨巧來心手自相應鍊畫金
戈出靈府蝨殘蚕嚙須臾間輕比飄蓬重飲羽案
上縱橫玉筋紋尊前拗折金釵股彙成方冊燦星

漢甲乙丹黃分兩部品題却笑楚才嗇天闕竹籐
良獨苦識奇無復有揚雄詠古誰堪追杜甫我來
開卷一研玩目瞪心忤手畫肚惟喜雲開星日懸
不虞鬼泣禽魚舞嗟嗟徐君磊落人生茲僻陋宜
孤窶楚山岌業楚水清風雅千年得誰主祇須斂
手待獨鑿無用低着求衆煦凡物固以罕爲貴末
流蕩軼先民矩世上豐碑多若林金字刻成名已
腐何如延陵墓碣十字強照耀千秋日亭午

湖口縣

匡山一碧三百里青鞵蹴天波四起

俗呼大孤山曰鞋山直送

湖波作江水白魚墮網不直錢高艫大艚停水邊
山城曉角吹寒烟城堞跨山盤屈鬱南北兩鐘高
屹屹獄底龍泉不可刺蘆花拜風柳枝掉舟子攢
着鼓雙擢司空使者科船鈔

石鐘山

鯨魚晝鳴蒲牢吼鐘化兩龍踏波走鱗甲出火霹
靂驚賈勇爭雄看急鬪馮夸懼欲空壁馳天吳駭
將徒手救五丁心膽故豪縱神斧歛霍風雨驟揮
空劈險龍怒飛蛻骨千年露蒼秀至今對峙彭蠡
口石壁銀屏分左右雙峰岱華鬱壯觀一水齋淪

浮遠岫瞿塘萬馬齧空來山腳泥沙煩洗漱秋高
夜發噌吰聲似聽鈞天歌九奏我來山椒一登陟
颯爽天風吹廣袖波春不異無射鳴杖擊猶同清
磬扣洞天一穴仇池通蝙蝠如鴉翻雪竇坡公千
年不再出荒怪憑誰訂紕繆蘇臺老僧下鐘住躡
漢盤雲結飛構喬松偃蹇送天籟潑刺長魚聽梵
咒上鐘佛屋半傾圮

俗呼上鐘
巖下鐘巖

碧瓦如鱗竄飢鼯頗

無天花落丈室只有荒榛封古甃老僧本是吳趨
人吳趨山石誰先後噫嘻太湖一片青龍伯鮫人
不能守良嶽亭前車驟馳平泉莊上瓊裹覆物因

獻巧難天全往往奇淫遭遠購茲山之石殊突兀
猶幸屏居托荒陋夜深但伴猿猱吟天寒長作駝
羊瘦移山載石彼何時卻羨兩鐘得長壽

河堤行上華亭公

鉅野東傾泗水渾淮黃自古相屠吞元光元封廿
餘載宣房瓠子徒憂煩白馬下沉隨越祝綠箭捆
載空淇園楚州以南廣陵北至今釜底波汙汙常
年穰稔秋未熟波神一笑天瓢翻高城三版蛭浮
動低田萬竈蛙喧繁巢居水宿盡赤子蒲魚那足
充朝飧浮楂歲歲挂古木屋瓦處處畱沙痕監河

使者下符檄柳枝竹槌山丘屯載土不怕坤軸折
伐木直遣南山髡役夫淖淖偶失足投擲真似鴨
與豚潰者方築築者潰天跳地擲無崖垠五風十
雨自咸若不知河伯尋何冤乞漿得酒歲云樂淮
民不免寒無禪糠粝滿筐靳一飽衾裯換米來何
門老弱半菽未黔突官長五袴徒見存行糜分穀
力不遍十有七八爲魚鼈去年天子舉玉趾六
飛載馳神駿奔翠華臨河三歎息指示脈縷探
巔跟高堰蜿蜒鍊石比近亦浪齧波濤掀全淮已
無刷黃力何怪濁浪排崑崙碣石夜徙歷陽陷清

口狹小如盎盆况聞雲梯沃焦處淤墊漸化桑麻
村水無所歸乃橫溢下隰何日成高原 帝曰咨
爾肱肱佐斯民胥溺勞拯援臨軒受命飲冰出衆
中底柱公其元公來笑談慰飢渴隻手驅逐千鯨
鯤赤符下囚羽淵鬼鍊索倒鎖支祁覓天吳撼隄
兀不動吏民瞪目看王尊有如蹶張射萬弩潮頭
打轉蛟螭喧濫觴率先堅版幹尾閭次第嚴周垣
萬夫齊力下杙椽金椎磬鼓連朝昏石隄初成兩
鵠告雪浪不聳三犀蹲明年隴禾萬家滿壓擔折
軸何軒軒公亦睂間黃色起錫圭告成還 帝闈

商丘公送緜津詩集及近稿數種率成長句

賦謝

亭午乾鵲噪客除馬軍剝啄聞傳呼百穀良玉千
明珠連城照乘世所無漫堂中丞列仙儒椽筆巧
琢青珊瑚力排丘岳句翻水玉虹倒瀉崑崙區有
如積風運鵬翼盪胸一芥看蓬壺又如巨鼎膾蛟
蜃貯水萬斛傾江湖手詩洛誦甫卒業頂背已灌
清醞酬一蠡豈能測大海寸指未易彎強弧漁洋
山蘊今大手與公鼎足爭前驅蔗甘藥苦別嗜好
恰今天膳調鮮腴綿津汪洋不可涉緯蕭騰越真

名駒筠廊新篇足荒怪解頤折角雄千夫筠廊偶筆公紀事之書也

吳風諸君鬪珍錯熊魚兼味登牢厨正如昌黎起

衰懦籍湜郊徹隨奔趨吳風一冊則試士拔識之作公所取皆一時知名士曆也吟

聲似蝸蚓蹇驢風雪呼詩逋譬彼行歌市中子渭

城一曲聲嗚嗚薄技止會巴人調極意亦類吳兒

飲金鐘大鑪未寓目但擊秦缶吹齊竽而公獎許

出意外欲與搏拊賡咸虞滄浪亭子新斲櫨大篇

喚出湖州蘇句中神韻歐九如小儒那可輕操觚

國中屬和以百數竹藤天闕嗟何愚公興復滄浪亭為詩紀事和者甚多

不敢效顰鯁生瑟縮袖兩手免飾嫫母隨名姝絲津新

詩百遍讀浣手洗眼研鉛朱冰蠶火浣出光燄寸
錦百衲何為乎低頭合掌欲下拜但愧削句仍繁
蕪千金一字不可易快膳百本懸天衢

玉清仙子者亦號珠湖野士秦郵陳氏女也

精三式之學壬遁兵占尤得樞要便弓馬習

騎射信異人也近居廣陵僧行西與陳中表

余因行公往垂簾問答者竟日數學該博詞

鋒銛利三式疑義莫不迎刃而解繼又自言

得長生之術雅慕冲舉因索余贈詩得絕句

八首

足躡雄雷御迅風手麾丁女配壬公晉陽娘子軍
行處鼓角聲聲出地中
一丸飛劍一編書理髮薰衣畫不如寄語香衾夫
壻道不妨金奏養鷓鴣
桃花叱撥不畱行錦繖輕妝夜斫營莫訝小弮弓
力軟射生飛箭似飛蟲
煬帝隄邊鬪草歸謝公渚畔踏青回春風十里珠
簾捲何處空空妙手來
名爲俠客猶敷粉喚作仙兄未離家學道從今三
洗髓御風騎氣到天涯

一斗紅珠綴繡旗孫家小妹比雄姿劉郎不免風
情在書到休輕帳下兒
短劍鏗然玉有痕中宵出入五侯門西園無忌千
金約賴有如姬解報恩
掌上孤虛日昃輪笥中篋數自通神懵騰小立真
如夢恐是畱侯似婦人

淮浦夏日雜感六首

選三

濁浪南奔萬馬雄清淮如綫失春容天連碧海盤
霜鷗水拍金隄轉雪龍四載禹功今未遠一丸蟻
穴古難封杞憂卻怕天饒笑且與平治磊塊胸

岼沙減水出蘆芽磬鼓頻催畚鍤加鄭國不難穿
瓠口張湯豈易漕去聲褒斜但呼白墮開看纈莫攬

青銅照鬢華鴻隙陂成歸有日把鋤學種故園瓜
手著渾未辨行藏日飲無何又醉鄉豈便黍低慚
麥仰固應策短羨龜長朝時梅雨衣衫潤何處薰
風殿閣涼卻笑軒軒雙病鶴空隨雞鷺繞迴廊

王幼芬太史使黔回以佛指柑遺德州公有
詩酬謝因步原韻並柬幼芬太史

水陸果實駢東南閩嶠荔子羅浮柑蹲鴟包橘說

歐九荷隩梨埒傳陳三

歐陽公詩禦歲畜蹲鴟饋客薦包橘
陳後山詩荷隩活萬人梨埒視千戶此

果未與食事便黃面金色如瞿曇強名曰柑字佛
指跟肘壅腫來青酣如來金粟有實相花鬢寶絡
垂耽耽雙林枝葉本無垢肯隨兒女誇宜男靈拳
結印洗白業天龍豎指開蒼嵐似掌局曲學鈎弋
如手控送停飛驂花瓷釘砌十餘輩茅瘴茵露猶
沾含古歡寓齋伴琴史衆香鼻觀時同叅繞床拂
拭轉千佛簷蔔駢汗優鉢慚暇豫因以指喻馬笑
揮犀柄同戈鏃誰其致者王太史蠻烟萬里提筐
籃旃檀妙品脫手奉食魚寧復畱餘泔夜郎天南
僻陋地珊瑚入網勞窮探此外長物復何有看囊

尚有朱砂龕摻手爪我無用躡跡陰馬吾猶堪
要須倒篋出數粒掃此白髮同夸戡

洪澤湖大風雨歌次德州公原韻

長江大海淮河湖五水環帶徐揚都七邑抔土渺
何似過涉不滅青頭顱底貢篠蕩兼蠙珠梯航百
貨窮怪迂邇來汨陳變沮洳厥田下下言非誣高
堰橫身若蚓蛭洪澤吐納徒區區一從彭城沒九
鼎汨取不得千人呼至今淮水宅怪物罔兩並駕
龍齊驅年年桐柏秋潦漲浮槎挂樹舟撐衢竭來
監河復陂竭指顧歲樂民吹竽而何黃能弄狡獪

欲傾鯨鱷雄牙鬚招搖西指律夷則迸落暴雨如
繩纍顛風借力助其勢雷公電母行趨隅湖水躍
立元冥鬪岍柳拔走根株殊通宵徹旦不停溜八
荒四野同一鋪天帝眼睛日與月忽鎖玉兔籠金
烏羲娥怕人肆嘲謔匿景便向雲端趨五行沴青
欲考驗黷慘不辨三階符蒼南舍北地咫尺淖潭
便隔秦楚吳吾師露冕大隄去老屋信宿當甌臯
陣雲導前連鼓後天豈有意私鴻儒聳肩搖膝出
妙句勢挾風雨凌虛無水性柔弱誠然乎眼中鼇
擲鵬南圖鯁生客居僅容膝浣衣霑足聊長吁屋

壁雨壓床避漏紙窗跋扈風鳴鳴不憂四海憂一
室吾淺之乎爲丈夫

檄四蟲詩

蚊

炎帝擲火鈴白鳥厲其羽高能蔽天雲細欲暗汀
渚癭結理或然鷓啼怪如許要是腐化物乘氣育
徒侶長夏啟書冊心靜敵煩暑夫何么膺蟲繞鬢
來耳語倏至先商量頻造遂爾汝嚶嚶響雌雷灑
灑急猛雨初謂無甚害漸省蜚毒苦劈肌下鍼芒
噉血引絲縷囊滿鶴尻高錐卓豹腳舉汲如轉輓

轆酣如奉尊俎批摑指掌勞擒十那得五爬搔汗
漬背膚若墳起土隔之朱裡幕薰以青艾炬驅斥
不多時鬼蜮復來處猝擊兒罷讀撲緣婦投杼力
穿牛馬革於人何足數引領涼颼發掃除不停午
羽孽席捲空快哉清涼宇

鼠

鼠輩何足道性黠持兩端白日甘伏匿昏夜乃肆
奸漏長燈火滅及時行盤桓墮梁聲啾啾鬪穴氣
嘽嘽忽嚙衣褚破漸見書簾剝橫行莫誰何無有
完筐篋豈少麟與龍幽隱非所安甘心斂頭角讓

爾競饕餐百錢買狸奴毛骨同羶穉縱不善彈壓
亦望事擊搏捕蟬上高柳撲蝶蹲雕欄鄰媪有伏
雌五雛長柔翰牢防偶不固啖食何凶殘腥臊既
不厭宜亦嗜鼠肝用爾爪牙力碎磔良不難而何
茵上臥泄泄秦越看昨夜客不寐在戶星初闌羣
鼠盜果栗行地如走丸癡僕不省事夢聽傾髡槃
嚙語學猫叫起看食已殫

蛙

池草碧辭春沼萍青轉夏羣蛙得其時炎薰力資
借瓴甌缺甃底泥淤土坎汙自謂天地間獨容我

叱咤圓腹爭膨脗突睛恣矍喙青斑類文身腥臊
躍長胯一唱和者百聞聲頗疑訝衙衙送落日嘈
嘈聒深夜清非蜩吟比細豈蚓窾亞怒頤癭忽生
談吻轂可炙難掩嗇夫口未免辯士詐公私鬧華
林堅白談稷下淫靡鄭衛音勃谿婦姑罵村究求
蒙童醉客碎壺竽虞夔金石瘖周瞽鼗磬啞鼓吹
等俗物况乃鼓吹假周禮蠹氏職灰灑類禁架王
者篤好生獨此少寬蕢乃知侈哆輩於法不容赦
南遷柳柳州盤菹吁可怕

蠍

我於四蟲中獨弛蠍之律偶遭詎常然踽行不朋
出噪豈鼃黽羣衆非鼠蚊匹跂跂縱能緣脉脉止
善匿微毒誠久蓄用爲自防術天地大能容人乃
橫見逼物謀脫已害延命在漏刻遺俘易擒生窮
寇難縱逸掉尾用其鋒痛楚便移日雖無脫腕害
亦比剝膚疾取譬宵小人懼貽衆口實寬假使自
悔豈竟作讒壘我乃急持之不稍賜顏色遷改旣
無路畔越非所恤君子小不忍噬臍復何及自古
有道士坦衷示真率非智不能勝不欲沽悻直卽
小可喻大聞一已知十縱蠱使自去蚊蠕保微質

欲如昌黎公喜見亦不必

喻司寇招同諸子寓齋讌集庭前盆竹一枝
輪囷曲盤高不盈尺黃質而碧理因取廬陵
怪竹之意作怪竹行限用工部入奏行韻

古潭蟠伏蒼龍雛鼻斲歛息風雲俱翻腰一覺躡
空起欲傾碧海搖方壺雷遮電逐不得過脫落角
爪藏形軀尋丈幻作數寸勢如屈汪罔成侏儒柯
亭嶰谷遠莫達匿此盆盎畱扶蘇孤生尙帶強狠
氣老根乳節生廉隅鬚髯蒙密鳧脚短跟肘蹙縮
貓頭麤風中時復一掉尾葛陂變化疑斯須檀槍

犀甲一當百底用千纛爭傳呼先生節槩與竹並
墨君著處收新圖紫筠綠箭世恒有金相玉嵌真
魁姝鰕生口腹累長者晨隨鈴吏來掘趨飽看此
君仍食肉腰纏跨鶴朝清都蘇詩若對此君復大嚼世間那有揚州鶴酒酣卻
作杞人慮黃淮瀕洞凌虛無蒲葦何罪遭剪刈民
不黔突村無酤此竹結實待飢鳳未許作棧隨茭
芻

玉帶生歌

楊鍊崖有七客者之寮以貯所藏笛琴管胡琴
古甕與硯並已爲七硯紫質玉紋所謂玉帶生

也舊寶於文丞相以贈謝臯羽後歸鍊崖鍊崖
作志命門生張憲作玉帶生歌商丘公幸觀之
亦贈以歌諸同人和之

胥江潮落白雁飛誰斲鼈足支坤維文山獨抱硯
田出奮筆屑涕揮雄詞蛟龍不合挂網罟虎口自
脫非人爲三宮銜壁水怒立正氣只欠天扶持臯
父得硯何所施用代鉛筑沙中椎魯連蹈海慶卿
死女貞花葉空萎蕤汐社痛哭客纔散起輦谷暗
陰風吹此硯閱人傳舍耳鍊筵老仙欣得之紫袍
玉帶稱上客玉筍長句尤恢奇赤城霞起瀑水隔

白虹影貫彤雲垂至寶縱復有晦顯神物要自無
成虧漫堂夫子方晏坐一方軟玉磨隄糜時平幕
府罷草檄不須更替廬陵悲蟲鰕草木待箋註門
生問字來褰帷相與聯韻效鍊體踏歌更和嬉春
詩

庚辰冬日商丘公舟中喜晤山言同學兼送

山言隨中丞公按興邑

緯蕭詩句妍且奇散帙一讀一解頤神交氣合聚
以類詩中照見君鬢蒼而况仙舟覲君面不徒卷
軸摹神思長安詩社共燈火敦槃玉帛光陸離天

下英雄僂指數屈強未易虛聲縻君來一麾肅壇
坵受降高豎騶虞旗譬彼籟雲躍龍種凡馬一一
羞疲羸顧我曹鄆狎盟耳晉楚尾驥勞攀追比來
八口仰衣食賣文聊作逢場嬉白日飄墮不繫腳
領下欲雪鬢鬕髭大科顯秩偶然事不自意讓他
人爲履穿足胝不易及息肩屏氣坐視之看同華
巔欲脫髮滿梳不復能收持君心玉節貫霜立君
詩鍊騎空壁馳勁氣夜撼亞夫壘好辭新揭曹娥
碑讀書十載任窮達才名萬口爭延推今年南宮
誰按劍衆狙喜怒無乃私中州門閥稱第一博崔

趙李非等夷

崔陵謂盧元明天下盛門惟我與爾博崔趙李何爲哉謂博陵崔氏涿郡李氏也

鳳雛驥

子比毛骨捉鼻不免猶須時竭來解逅遂別去昭陽淼渺天一涯夫子按部拯災溺左饋右粥看行糜吹螺擁節侵曉發鯉趨亦辨羸滕隨蒲稗遍野唼鷺鴨魚蝦晚市登梓遲楚將山荒野水白湘纍廟破西風吹感時弔古發新唱濯纓更和滄浪詩明年看君到何許丹山萬里行相期

步韻商丘公秋日廣陵雜興八首

選四

簾捲春風憶昔年青樓薄倖杜樊川揚州鏡子盤龍樣欲鬪銀濤璧月圓

連牆野竹滿庭苔六纛門前逐曉開不用材官陳導騎東鄰探看此君來

艣聲鴉軋並溪聞灣口新河燕尾分打轉船頭望歸路淮流脉脉雨紛紛

南臺九日且乘閒謝客新篇未許刪

宋武登戲馬臺賦詩百餘人以靈運詩爲

第一江上青螺何處所寄奴村落戴顓山

江左十五子詩選卷三

